

宜黃縣志卷三十一之六

藝文志 詩

平寇詩 代作并序

明涂

幾



至正十五年天子命翰林直學士吳公以江西憲來
總戎江西冬至於撫公大布威德文武並用不踰年
而成駿功非公任將得人何以臻此偉如也某撫人
而學仕於盱感鄉郡之底寧思與一州五縣之生聚
蒙戴大德永永無極故作詩以美公撫人更生某目
覩而見也故不及公他郡撫寧之事云

維撫有孽既黜而兇屢伐不服以干我戎維天子有臣
既文且武出師於郊士怒如虎公昔始來飛書諭蒙彼
卒不化乃謀乃攻公服振振囊弓載行出師於郊萬夫
則聽公有善將能振予旅拳勇畢陳既入於阻醜徒如
雲屢侮王師公將有嚴王師不隲俘馘纍纍大小畢來
公將勇只公畧用只孰敢不程往剿其壘既底於降戒
掠於師或取其茅投爾礮硃軍士濟濟凱還而歌噓枯
沃炎乃底太和西姦未窮有孽於東命將往擒火原爲
紅困獸匍匐願遭天誅公釋不殺俾前其驅撫人未寧

爲肉爲魚今旣寧止民情舒舒撫人旣寧羣方畢回自
江東西無遠不懷有穹者碑有嚴者祠祝公萬年福祿
如茨福祿如茨公乃國基諸侯之師社稷是毗公去遲
遲公無我違作詩抒懷撫人之思

涂子類藁

按題下代作二字及序內撫人學仕於時之語當是
代鄒元方作也

隨父廬祖墳父子相隨孝靈芝特地春北海呂元簡四
世爲家主以至牛馬羊異母皆相乳虞卿董恭直鞠養
諸孤遺鵠鵒與鴉鵲同巢而共枝孝行動天地鳥獸皆
隨時又聞猓然獸死不相棄離蠍蝮與鮫魚子母長相
隨獸面而人心此獸信有之獸心而人面其人誠可悲
李鈞爲侍御棄母在温州母因歿餓死甘旨何悠悠光
祿李玕者亦是斯人流有母不侍養異居經千秋唐家
法網寬貸死流遐陬崔湜爲侍郎天子賜瓜香攜歸與
愛妾老母不得嘗一旦惡貫盈殺之於路傍越公鍾紹
京至孝何殊常少時得果瓜先解進高堂長大遇元宗
榮華不可當孝者名常新逆者污人倫人旣不如竹乃
是一埃塵夫爲人子者莫若事尊親夫爲人父者莫若
教兒孫積善與行孝可以立其身我願移此竹栽於率
土濱使彼行人見皆爲慈孝人樵童見此竹且莫伐爲
薪

晦堂歌爲邑令宋天經作

宋鄒極邑人

吾邑有賢令材猷足經國政成越一考俊譽自赫赫卽
圃闢後堂背南面西北爲愛圃中景花木皆手植乘閒

一造見問名名未得反覆為君思請以晦題額晦取用
而明非謂入宴息韜藏莅衆術蓄養輔世德制動本以
靜對語定以默大欲揚王庭小亦去民忒有如匣中劍
利在誅奸慝又若山下泉出乃作惠澤公家急期會訴
牒仍堆積一判情偽分經目猶白黑堂中琴寂寞昔優
今逼迫堂內經縱橫客至君欣懌豈無詩酒興相與樂
暇隙平臺歌舞地池上有瑤席坐揖竹風細行依檜陰
直返照亘天紅輕煙半山白試觀禽魚戲所畏網與弋
我晦異君子終焉茲屏跡出處各一時俯仰無愧色作
詩見情性擬古麗以則

仙人石

宋 徐圓老 邑人

花開炫紅霞景接長春壑終古斯石存蒼苔浣雙脚安
得洞仙來重遊跨白鶴

鳳岡隱居

元 吳 當 崇仁人

鳳凰千仞岡中有隱者廬流水繞屋下青山當座隅鄰
曲不在多聊可共耕鋤種菊秋露重劬花春雨餘松下
揮鳴絃涼風滿庭除振衣紅塵表濯纓清水渠虛名果
何益此樂將焉如伊人幸同姓行矣巾吾車

草廬集

楓林夜月

棠陰入景之一

明吳餘慶

邑人

田南有陂陀干峰葉初赤皎月出黃昏交柯懸素魄寂靜風露寒微茫海天白斜影落陂池餘暉滿阡陌安得王子晉行歌共吹笛飲罷一樽酒復酌林泉石

十月望日同黃子和至陣亡表弟潘翔墓上黃子

作詩二章弔之予因思敘其起兵本末為詩六

章使從者祝而奠酒以代諫也

國朝曾鳴謙 邑人

孟夏羽書至峒寇肆其凶殺氣聊天日鄰境方搜鋒令

急需智勇獻策孰可從倡言舉義旗慷慨見英風

乃鳩其族類桓桓百十人勵師酷日中汗雨灑沙塵露

處明月下枕戟臨星辰吁嗟草莽士反思致其身

五月廿八日偵賊潛源口晨爨未及餐褰旗惟恐後餒

腹以挽戈奮身殲百醜日落無聲援力竭而殞首

野老指戰場乃在平沙岡日光寒寂寂雲色黯茫茫為

言風露中餘魄時腥香細看血漬處的的耿精光

雄氣結寒煙夜聚星月裏時呼殉難人譚笑說兵事白

骨暴沙場君志素如此何曾有怨衷感嘆亦徒爾

我母爾之姑爾父則我舅父雖稱異姓母則實同胄吁
嗟兄弟情腸斷於醇酒朔風蝴蝶來魂其將左右

與子和遊石碧道連天碧而歸

國朝

鄧官賢

邑人

信宿梵音內通宵忘話言天明卽竟去不復辭世尊留
詩在几案雙鳥已出門出門去何之行行歷山樊邱壑
性所慕豈憚跋履艱漸轉烟中岡忽露林下村始見有
室宇更復多田園心知故碧在古跡留遺墩慕此有年
載層崖今始扳豈謂半天上只如平地間築室願相托
塵情曠未閒深羨此中人經年不下山

龍書堂集

春日郊遊抵石碧寺

國朝

黃士光

邑人

黃鵬鳴樹上三月春雨晴出郊二十里辛勤見偶耕和
風釀花氣暢我吟眺情探奇忘遠涉香刹恣遊行石泉
沸綠茗素食飽青精松篁夾幽徑複道駕長鯨徙倚茲
石下清飈兩腋生雲山多薜荔客意忘簪纓夕陽度歸
鳥湛寂道心明去去不忍別峰迴聞磬聲

秋日南華晚眺

國朝

程九區

邑人

微雲盪輕陰落葉積山路素心三五人郊行趁晚步層
巒紛送迎仄徑莽迴互俯視見烟火村落此環聚返照

入深林秋聲在高樹日暮憶忘歸快然欣所遇 牧邨集

晚同黃大仰甫登仙人石招搏南共話月出始歸

國朝吳瑄邑人

平生投分少參商苦難併故人欣會面 時仰甫歸自南康 歡言

意未騁攜手共散步斜日仙人嶺忽憶地主賢 搏南佳仙人石

下招邀畢頽景藉草忘久坐煙雲窈深靚夜氣轉孤絕

霑露衣裳冷語餘感歎生低徊內顧省頭顱誠已知懷

抱鬱耿耿年事易徂謝倏若駒過影歛迹疑今懦抗志

負前猛顧惟我輩人未應就幽屏有為譬井泉無用豈

土梗平望東邊峰月出清光同一笑且歸休有燭未須

秉

卓望山對雨

國朝汪德鵬邑人

朔風從西來吹雨落野寺人與寺俱幽虛谷故深邃衝

煙度櫺軒飛雲紛綬黥黥闐無涯漠漠耿秋氣點滴

叢竹聲竹靜知雨墜蕭然萬慮空洗心洽冥契 雲谷詩鈔

仙人石

國朝黃爵駝邑人

一石何橫亘上有仙人蹟仙人不可期終古此山碧吾

廬在其下相對足晨夕屏風列戶牖嵐光落几席背山

有書堂境地頗幽僻吟罷一登眺千里僅咫尺竹間風
微聲松上露暗滴山蟲響沙沙野鳥鳴磔磔道然心目
間與我無非適時有采藥人來訪讀書客

石上產香蒿草最著名

宜黃尉李集義遣書問安否小詩為謝

宋 孫 覲

五年着南冠兩見芳歲新朝為虫蛇侶暮與魍魎鄰行
隨木上座卧對竹夫人獨有金石交不廢風雨晨書來
一弔屈我已屢厄陳嘖嘖爨下桐嗷嗷轍中鱗緝以朱
絲繩放之碧海津窮途得重惠肝膽大輪囷

見鴻慶集

徙寓妙覺寺佛舍胥又民襍被相遇賦夜坐

宋 孫 覲

客居厭窮途違艾翳環堵莊舄尚越吟鍾儀猶楚語吾
人有奇操空洞見城府相逢逆旅中霧豹初一睹拘囹
賦囚山避謗增市虎褰裳肯過我崖嶠走風雨微吟對
清夜破此五月暑墜露浥金莖空花墮犀塵孤燈映籠
紗冷艷翳復吐耿耿遂不眠逢逢聽晨鼓

借余東木遊石塢 國朝 藍千秋

青城一片石落我山之隅霍靡茂草封鬱鬱林莽俱巨

靈歛疏鑿太樸傷鍾鎚橫巒堪隱几踵息每遼遼丹嶂
萬古色上覆碧穹廬諸峰羅睥睨儼擁專城居秋杪借
良朋躡磴排空虛竒姿邈冥契谷懷方起予眇眇遺八
表豈惟塵慮祛相視訂卜築共披霞外書

登陽坊南華山

國朝 歐陽文楷

峭壁矗天漢遙疑無路通山迴春草綠一徑懸虛空石
磴七百級直上最高峰俯瞰毛髮豎足下飛鴈鴻峰巔
有深潭萬丈蛟龍宮投石發巨響噌吰如洪鐘云是陳
真人禱雨留遺踪至今旱太甚猶能利老農探竒客旣
倦復憇香刹中茗戰已逐北治饌屠籜龍讀詩古壁間
師友曠音容懷人發長嘆松壑生清風

送黃定軒謁假南歸

國朝 朱嗣韓 郡人

翰林號清班文章粲巨伯君本著作才如何遭別擇

朝廷重部曹往往佐學畫況若農部繁尤藉經濟策堂
堂雲南司官員示漕白潞河千萬艘一一由所益君胡
不少畱亟返五畝宅君言老母在衰顏藉晨夕幸庇先
人餘粗給衣與食窮通吾有命捨此良可惜感君爲此
言怍怍久未釋老矣我何爲身世一雞肋會當從君歸

收景桑榆或珍重曹溪山涓涓味一滴

北山

國朝 黃秩忭

新居枕北山山作北風障碧延古薛斑紫抱曲屏狀秋
深稻廩豐晴透夕陽暎歸鳥不絕聲楓人立相向塵羈
何日寬長嘯青雲上

曹山

宋 孫 覲 晉陵人

石棧梯空一線橫路窮臺殿兩崢嶸日光淡淡鳥飛沒
雲氣漠漠龍隨行道入西歸餘隻履結茅宴坐千巖底
草根漑漑暗泉鳴樹外騰騰青嶂起翠竹掩冉蒼雲屯
老藤蔽日白晝昏天低尺五雷雨上身強丈六佛祖尊
垂老棲棲厭行旅逢人欲問前生語不見高僧杖錫飛
山下空流千斛乳

石砬

宋 孫 覲

何人手執造化關投此虹霓跨兩間烏鵲填成天上路

鬼神鞭出海中山飄飄尻駕凌空舉側身下瞰千峰雨
河漢洶洶聲西流風雹相纏齊萬弩始信通天有一門
便欲晞髮扶桑根乘槎忽遇支機石拄杖直到洗頭盆
賞俊誇雄兩奇絕邂逅一觀如電掣冥冥滄海會揚塵
大字磨崖書歲月

一翁亭歌并序

宋鄒極邑人

元祐辛未歲余年四十九管勾玉隆纔朞有半遂致
君事友人劉資明守零陵郡與余同齒以詩見貺有
跂羨之意卽次韻答之末句云願君早作歸來計同

醉園林二十春踰年資明奉使廣西錄寄所遊歷詩
數篇皆著思鄉之意蓋憶予言也所居相溪一嶺嘗
欲作招隱亭於嶺巔喬松之下左瞰邑郭雙溪右覽
花嶺諸峰俟其歸穴墻以通往來朝暮得以曳屐攜
筇同登醉吟相樂因和其詩末句云休緣招隱空生
嘆自是中心悅美官又篇末云如君報國須終老閒
健歸來只一翁姑以謝之去年夏六月資明請宮觀
以書促余造亭余欣然命工展基度材須農隙乃建
是秋八月資明訃至余哭之慟復何待焉亭成以一

翁名之時崇寧三年甲申正月也

一翁亭高半空住老健身輕若平步昔約隱者招不來
今日招魂返何處亭壓峻嶺出茂林百里山水如鏡聚
俯窺井邑在淵底鳳臺獅子沉煙霧豁然氣象心胸開
陰晴異景天際來巧思難窮畫工筆冥搜不盡詩人才
春歸谷暖花卉亂士女遊嬉情爛漫暑風清快秋思多
玉樹瓊樓雪中看時時獨上凭危欄爲愛孤松不可攀
百年天畀作伴侶偃蹇肯落塵凡間有時攜琴坐松下
竹徑雖掃門常關風吹清韻月散影家僮不至那知還
有時爲招三兩客對松置酒味松德壞梁棟撓彼小材
大夫自是龕官職醉來摩松鱗觸手汗松以官亦何有
許由洗耳常不嗔伯夷餓死吾無取登亭自負只一翁
四海退者豈我同多緣矢志畏罪廢往往養譽要正公
我由蘭署出持節按道適至親庭中亟遭大變僅存息
無復有意圖勲庸遂瀝丹誠扣天關乞得真館棲玉隆
歲餘尙厭仕籍在抽簪解組顏猶紅是非榮辱自此杜
生事無憂付農圃種蔬植果雞魚肥日具賓庖式歌舞
斯亭最後得景多百年過半能幾何經營土木亦可止

盡取此生適而已

鑑泉歌爲邑令吳無求作

宋鄒極邑人

鑑泉之竇山之麓百年蕪穢暗渟滯吳侯天與仁智資
退食俯窺嗟不足試披沙泮鑿爲沼深纔數尺闊盈幅
迸流日夕不可窮碎如珠璣瑩如玉南隣野叟號逍遙
蔽石枕泉眞所欲一來臨視推不去草草杯盤勉君速
解衣款入凌陰坐六月正午忘暑毒滌煩沃渴汲復溢
長流清風去殘酷此鑑不窺示養正用明豈特鬚眉燭
巧非鎔範淨非磨應物無心奸自伏竇匱青銅世所眞
鳳舞龍盤耀人目勿輕勺水當靜觀能動天關翻地軸
主人寶此方澄清野叟撓之安敢瀆舉觴隨分擁叵羅
醉狂擬學鴛鴦浴世無秦法飲無禁心動胆張驚且縮
可憐滌在百里間四海王明俱受福顯幽用舍姑置之
君顏漸凋吾髮禿相逢一顧一回笑滿酌爲君歌此曲

月菴歌

并引

宋鄒極邑人

吳無求令治鑑泉之明年夏六月畏暑濕思高涼因
退食之暇登廳事之後縣山之巔環視翠遶旁闕古
木數株直幹樛枝瑰挺竦特駭人心目上蔽赫日下

陰廣阜而爲荒榛穢草之所障足窒而不能前無求
立命誅之鋤之剔之夷之稍進而息其下則密葉如
幄清風滿襟平視周郭之山遠近勾連千重萬疊秀
出於雙溪之上溪會於郭岸直北而東有鳳臺獅石
衍然而截其流汀沙烟蕪映帶於井肆樓臺之外無
求爲之歎息曰溪山之美登覽之勝盡於此矣予爲
邑僅二年而今始得之豈非山川物象之顯晦固有
數耶不然何昔暇於治鑑泉而不遂及此於是卽木
陰之下闢土丈餘置奕局焉累石甃甃環以瓦墼命
之曰爛柯臺又直鑑泉之上臨山之崖後倚巨木結
草庵設竹榻命之曰月菴自鑑泉之側安木梯鋪以
欄楯上通一徑曲折數十級乃置臺與菴過環翠亭
北循徑而下則後園也工旣畢南郭逍遙翁鄒極愛
其佳境往而歌之

吳侯之來適荒年政修民蘇猶解懸庭無留訟獄屢空
百姓愛悅奸吏悛公餘何以度永日坐督皂隸先疏泉
泉瀦爲沼淨可鑑清範卽與名俱傳今年時豐民事簡
退食縱步山之巔誅鋤蕪穢出古木矯如虬龍上參天

夷高培坳蔭其下百里勝景盡目前爛柯石局候仙侶
月菴竹榻容醉眠或弄瑤琴或放歌或談元理或安禪
圓虛洞照萬緣息乾坤有量斯無邊菴中主人趣高上
喜我相過時留連所嗟官滿美遷去肯顧衰翁須後賢

鳳山揆倚孝廉李希哲

明 鄒元標

翩翩紫鳳止於邱鳳之山可以塞流鳳之水可以消憂

紅林寺

明 劉彬 邑人

紅林春日多風雨古柏參天渾欲舞騷人剩得一日遊
老僧未解三生語五陵公子馬如飛屨杖開行古所稀
逍遙獨羨松門隱相對長吟忘却歸

黃山行

明 徐鑾 邑人

黃山九曲溪九縈懸崖盤壑交層冰西峰屹立挂落日
東峰直走奔長鯨團青擁翠飛不斷蒲草迎人動幽翫
靈湫下瞰百丈潭龍涎噴雪崩山岸朱幡寶幢烟霞迴
上方樓閣雲中開一池白霧欲作雨須臾遠送前峰雷
青蓮朶朶登孤石星河挂戶橫絕壁隔嶺元猿不住啼
五更月照空山白笑蠟長松霜露饒登攀直到青岩堯
僧從海上飛空錫客向山中吹洞簫藤蘿門外飛晴綠

隱隱鐘聲度蒼麓石橋赤坂人行稀鳥雀歸來喚深竹
洞口經春細草芳山花相對酒中香一身放浪江南小
兩袖清風萬里長

豐山行

併序

國朝

鄧官賢

邑人

崇禎戊寅歲二月寇聚豐山作亂假佛道行妖術時
有密密教紅紗罩之謠縣城去山百里許邑人震懼
而別聚鉛山者已破瀘溪迨建昌矣隨經中丞解公
討平之村民殘戮實甚詩以紀之

軍峰之嶺高插天仙壇萬仞雲茫然鸞笙鶴管不知處
豐山聳接仙壇巔懸崖大半蛟螭窟曉夜烟嵐障天日
層巒似戟鋒槎枒終古如秋氣淒栗忽傳山麓嘯狂氛
紅紗罩處妖雲屯燒香聚衆講韜畧流布妖言人駭聞
流言末劫刀兵起寶劍神書授眞主西方大力大慈尊
大轉金輪帝東土呪傳密密降神倡三十六隊分魔王
青天白晝役魑魅百千火首同金剛五方旗幟分門列
蟻陣搏沙爭啟穴神岡近接豐砦傍腥風始試刀頭血
朱門廣廈高巍巍可憐一炬成荒堤守闍纍犬嗥殘磔
乳燕銜泥林表啼宜城彷彿莒城惡旋補頽垣築新郭

荷笠登陴苦夜寒淒風冷雨傳金柝饑民方苦歲鹵荒
官廩曾無十日糧田廬積聚爲寇飽罄懸千室空殘疆
西江歲值承平久籍內官兵半衰朽市廛半集亡命兒
未陣先謀脫身走重關匝月閉孤城田疇草色連天青
奔男竄婦滿原野儼如將兩飛蜻蜒別有鉛山寇氛作
兇鋒暗陷瀘溪郭誰其主者張普微聯結豐山勢犄角
堂堂藩府重於山百版金城寧等閒小醜彈丸偶得志
敢覬神器窺雄關司馬中丞冠髮豎命駕肝城戒徒御
日傳方畧授中軍羽檄如星遍諸路寒食清明細雨天
柳花飛絮榆飛錢郊原好景有誰踏每日高牙風獵獵
將軍八陣烏蛇圖壯士千騎兕犀甲撻鉏揚纛鼓南行
村村啼鳥無人聲三軍滅竈再添竈一路山程連水程
前番左次議招撫蠹爾頑苗逆干羽無可奈何王者師
十數材官齊奮武林木震動山岳摧一團蚓堙崩春雷
豐山日月久沉翳軍聲一盪昏霾開薄天烈焰毀巢洞
佛手無由遮大眾隨身寶幢成空言布地金沙總閒夢
千隊匆忙下樂庄蟻羣失穴蜂離玉鬼燐熠燿水流血
狼鬣無光毒氛滅渠魁授首服典刑法外垂恩道諸孽

倦此妖謀三五年法身無量宏因緣寶劍有靈落何處
神書想已飛還天中丞露布奏天子題曰老臣宜萬死
但願湖湘盡削平赫赫皇靈振寰宇

桃源洞

國朝 鄧官賢 邑人

武陵奇事不容再靈境仙踪偶然會神仙何必盡桃源
桃源未必神仙在此地傳過呂洞賓風流原是蓬萊人
相逢俗客飲村酒豈有仙人還避秦故廬烟火接山麓
頗愛仙源名此谷溝通流水擬漁津戶種桃花夾桑竹
春來花發如武陵還有神仙來過曾若令當今如秦法
試問藏身能未能

赤松庵

國朝 鄒文璐 邑人

荆國好學徒泥古臯夔稷契常自許一朝新法多更張
誤信姦回章與呂我公解組顏猶紅杜鵑之嘆毋乃同
萬山深處赤松築願隨仙人黃石公天下紛紛急征賦
正士踉蹌謫官去此時始識公歸心不待知交絕劉恕
材不盡用老丹邱世欲求之終無由行路至今增歎息
賢人隱遯蒼生憂

中秋登石碧看月

國朝 吳高梁 東鄉人

前年遊武夷佳節阻風雨踏月在歌卅六峯中秋卽過
吾能補昨聞石碧奇幽懷連夜騁一笠飄然遂入山渾
身綠透松杉影松梢細路千盤迴峰勢忽轉平田開泉
源不識發何處穿林落澗聲清哀一寺峩峩半山出前
有危樓中淨室繞門流水自成谿瀑布斜飛衣袖濕一
山跨空爲石橋橋身橫臥當層霄橋下洞天頗軒豁吞
吐白雲如海潮看雲我正坐盤石四山蒼然來暝色高
樹長風捲怒濤懸崖恐爲乖龍拆須臾明月升天東岩
花谷草先玲瓏我行對月弄清影月亦隨我移吟筇月

下道人吹鐵笛笛聲搖曳天微風風定三更月亭午一
輪皎皎臨中峯峰峰積氣化空水爛銀盤浸青芙蓉浮
雲萬里淨一掃人海垢濁皆冰融我聞諸佛以月作名
字清淨解脫妙諦同吾心之月亦殊特五蘊偏若雲相
蒙但能離垢卽無礙世界普入圓明中青天萬古玻璃
色明月年年有今夕請將法慧證華嚴我與此山誰主

客

清淨月佛解脫月佛殊特月佛
俱見華嚴經香蘇山館集

鄒次魏黃善長携文見過小詩爲謝 宋孫 覲

鄒郎英妙知名久華端自有談天口客舍相逢一杯酒

衆星錯落見箕斗高論欲追牛馬走長嘯忽作蛟龍吼
餘子碌碌那得友江夏無雙亦其偶我觀二妙屠龍手
青紫紛紛何足取他年要作中興碑大字磨崖繼聲叟
志新遣兩介致書餽以巴源紙黃甘珠欖大栗鵝
鮮胎蝦爲餉戲作長句爲謝 宋孫覲
巴江新擣萬穀皮褚生粉面膚凝脂故人千里特寄我
落華宛宛天投霓綿囊丹果十襲包爆栗飛盡石火敲
紅鹽著樹落青子香霧噴手披黃苞蒼鵝無罪見菹醢
苦酒濯之光五采蝦蚶久已成枯脂咫尺波濤渺江海
客舍爭席紛滿前饋羹不復五漿先殷勤重餉有吾子
兩夫荷擔赧其肩

獅子石歌

國朝黃錫禔 邑人

初平叱石成羣羊須臾羊復化爲石仙人幻戲一瞬間
羊耶石耶兩陳跡江頭獅子來何年萬古屹立凌風烟
虎豹股慄不敢過疑有髯髻獵獵流饑涎混沌之初但
一氣忽然激盪成山川流者峙者各奠位乃復一一施
雕鏤我聞漢時踈勒始入貢怪狀不覩周秦前何人肖
貌鑿茲石自非神工鬼斧無由緣乃知造物之奇何不

有白衣變化忽蒼狗夜靜風號洞壑喧似聽華嚴一聲
吼

黃鬯泉八分歌

國朝謝階樹邑人

三倉之法世稱古剝蝕殘缺杳何許泰山之銘受禪碑
尚有遺文瘞塵土嵩山石室殊茫茫誰其傳者蔡中郎
八角垂芒誇神授石經殘字搖人光吾子鬯泉獨有神
蔡邕九勢得其真多力豐筋稱聖手生平未肯輕與人
我與鬯泉論交深贈我數字等兼金自言興至多鬱拂
得意不數程元岑綠洋香裊金貌篆軸之琉璃束之絹

雲峰寺

宋樂黃庭邑人

巍峩山半寺幽景獨牽吟雲鎖定僧室鹿眠庭檜陰石
峯岑隱隱金殿氣森森到即無他念令人有道心

題顯揚寺踈快軒

宋鄒極邑人

溪邊穿小徑寺後起幽軒伐使惡木盡養教修竹繁
聽漁唱靜臥隔市場喧踈快宜人處追惟子美言

題招福寺檀欒軒

三首錄二

宋鄒極

開軒得幽致檻外築檀欒日射黃金碎風敲碧玉寒暑
清移榻就雪煖擁爐看一水塵埃隔壺中境界寬

宜黃縣志
出郭渡清溪僧閒晝掩扉造軒惟愛竹植杖卽披衣家
舍杯盤近村莊雞犬肥頻來君莫厭倒載夜深歸

曹山

宋孫覲

翠擁山歸座珠跳水濺裾香消塵漠漠日淨竹疎疎身
老百罹後春幾一夢餘故林千嶂外孤抱幾時攄
柳弱千絲颺河橫一帶圍腰肢春作瘦鱗甲雨生肥逐
伴魚兒出爭巢燕子飛匆匆班草地不覺臥斜暉

鳳山

明蔡秉經

道路逢佳節風光憶舊遊青天孤鶴唳落日大江流形
勝吟難盡登臨老未休偷生如有術吾亦問浮邱

鳳山觀

明呂文質 邑人

鳳石家山遠悠悠懷舊心蘭香春院暖竹影午窻陰明
月樽中酒清風石上琴田園多樂趣何日卸朝簪

玉華山

明劉崧 邑人

翠巘千峰合丹崖一徑通樓臺上雲氣草木動天風野
曠行人外江平落雁中傷心俯城郭烟雨正冥濛

四應山贈涂若水

明祝嶽 臨川

四望曠無際山從茲得名烟中荒野色枕土遠灘聲玉

斧泉如舊丹臺氣自清高人讀書處相訪此時情

長春觀

楊元溥

偶到長春觀長春景若何落花紅雨亂啼鳥綠陰多洞口惟丹井池中盡白鵝相看渾不厭回馬夕陽坡

自題水竹山房

在崇仙觀下

明劉果

邑人

雲榻十年臥人間幾轉蓬杖藜看暑雨倚劍候秋風著述歸揚子安危仰謝公月明清絕處獨立聽宵鐘

刺桑殘月

明譚綸

邑人

光引天星動微茫帶晚烟青蛾一織老玉指半痕鮮不道今逢缺翻疑尙未圓巖城鐘漏絕斜影透西偏

福堂寺

明劉鹽梅

邑人

秋暑殊未央籃輿憇福堂山深無俗韻閣迥有餘涼草露珠璣滑蛩聲管籥長年來喜幽隱欲借老僧房

遊東嶽觀

明徐鑾

邑人

雙鳥行山觀桃花落燕泥劉郎增舊憶道士感新題晴鳥吹元管春苔染綠衣乘閒尋物理身外喜忘機

羅漢寺

明馮舜臣

襄陽人

訟簡心常適翛然宦况閒忘機共鷗鷺借事到溪山嶂

遠千峰匝襟橫一水環入門謝車馬半日且禪關

偶宿雲峯

國朝程百度 邑人

古寺雲封徑空堦月印禪我來無宿約僧話卽前緣竹影搖溪碎藤陰覆石圓蒲團觀衆妙此是淨明天

同建侯亦杜燕及遊集賢庵尋集栢子宅中和建

侯韻

國朝傅占衡 臨川人

最是西郊好留爲將別遊茶烟僧動竹觴咏客經邱細雨山偏染巖城醉不愁重來期少長袂向暮春修

秋日上蓮花峰

國朝鄧官賢 邑人

山晦仍微雨丹臺不易尋亂泉侵仄徑雜噪見幽禽天與崖端合雲隨屐齒深上方鐘响處知隔幾重林

輓洪介亭編修

國朝翁方綱 大興人

磊落輪囷氣朋遊近已無詩編家世繼自號小容齋衾枕館

垣蕪每養病宜黃館忍讀南豐記嘗屬予爲書學記尙未勒石誰披太華圖

典陝西試歸平生知己淚馳訊問東吳謂顧南雅

龍泉寺

國朝黃蘭茂 邑人

秋風吹雁信落日照龍泉路自蓮塘曲門因竹徑穿鬪碁僧事少覓句鳥音聯回步看新月亭亭出暮烟

玉華山

國朝 余寅止 邑人

壁立疑無路，紆迴鳥道通。山田青靄裏，老屋綠陰中。兵

甲傳遺事

康熙間耿逆僞都督樂某駐兵此山

桑麻見古風，浮雲同世態。

變幻總成空

蒙泉詩抄

與熊質民丈小飲閒園

國朝 余寅止 邑人

田園摘蔬果，獨夜與君期。明月映尊酒，寒蛩吟竹籬。雲

開秋水遠，風定野煙遲。幽寂了無語，會心良在茲。

蒙泉詩抄

宿曹山寺

國朝 黃慎行 邑人

行遊日已晚，梵刹一宵眠。地僻門關早，山深寒冽先。

香僧入定揮塵客，談禪又逐曉鐘散。塵心祇悵然。

登鳳凰山

國朝 黃慎行 邑人

梵宇凌空構，登臨興自殊。嶺高人語靜，天濶磬聲孤。烟

日低樓榭，江雲出畫圖。茱萸新酒熟，詞客好招呼。

硤石邨訪洪鑑亭和韻

國朝 吳照 南城人

岡轉坳難見，坳窮路又開。雨跳雲碓外，嵐撲筍輿來。吠

犬迎新客封，缸醅舊醅花。朝失前諾穀，雨得表裏

翠毯秧新綠，田家畫是詩。傍廬開講塾，書券就蒙師。水

足閒人少，締粗販客知。

地產苧布

與君談不倦，調語及文辭。

遊義泉寺

國朝熊璞 邑人

秋聲樹杪出絕壁洞天開野徑緣溪入山亭載酒來烏
鳴巖下竹人釣石頭苔坐對數峰晚悠然帶月回

仙人石雪霽

國朝黃錫禕 邑人

山館雪初晴窻開樓閣明高墻礙晚照瘦竹聞寒聲水
瀉消新凍雲飛出故城更當初月上梅影一枝橫

登軍峰絕頂

國朝黃錫禕 邑人

靈風駕兩腋吹我上嶢峣棟宇高鄰月笙竽冷透霄人
間千仞隔何處九州遙髣髴雲中見仙人王子喬

過東岡環山書屋東素堂

國朝黃錫禕 邑人

面面山都合一樓當翠林路穿青竹香門掩白雲深此
地容高臥知君愜素心幾回花月下杯酒發清吟

鹿岡弔先賢杜子野先生

國朝黃雲 邑人

宅是薌林寺祠仍拜宋賢高風今不作餘韻世爭傳墓
道還存碣顏碑已化烟徒令懷古者仰止白雲巔

哭張薇軒

國朝黃雲 邑人

既不與世用奚為產異才天從何處問士盡欲心灰即
賜方干第難消宋玉哀素梅花競放徒弔舊書臺

最烈閨中婦生存奉北堂留身充子職截指殉夫亡却
以淋漓血還書痛哭章有祭夫文嗟君魂不返高臥白雲鄉

寄情吟草

登石碧

國朝 鄒鍾嶧 邑人

亂山圍不住天半度飛橋偶作遊仙夢憑虛上玉霄秋
峴煙靄合陰洞鬼神朝好事希前跡吹笙待子喬余祖一翁

公桃源遇呂仙後嘗遊憇於此

宿香源寺

國朝 鄒鍾嶧 邑人

數里香源寺垂楊水一灣地偏僧古樸時暇物幽閒花
雨常飄澗曇雲不出關更宜新霽後青翠滿空山

菡萏禪林

國朝 吳嵩梁 東鄉人

蓮性通三昧靈山此結胎根無世法染花為善心開甘
露清涼遍香風智慧來會須參覺分彈指見樓臺經曰
菡萏華又曰如芳池日能開一切善心蓮花又曰如蓮花心一切世法不能染也

贈余誠齋先生

國朝 吳 照 南城人

黃水繞柴關烟光庭戶間老惟專一壑筮早得兼山樂
道心常定無求意自閒應知筋力健未覺鬢毛斑
暖雨向晨驟草堂終日幽苔妨屐齒滑春借酒尊留感

舊開遺稿

時出羅羅樵先生詩見示

探奇阻勝遊

是日約遊石碧寺不果

預為

他日約來往一扁舟

聽雨齋詩集

杏溪訪余子安丈次白廣韻

國朝

洪占銓

邑人

春風吹杖履迤邐水雲間自得常觀物無求不出山教

兒談道熟課僕種蔬閒座右箴銘遍高懷見一斑

花竹秀而野結廬清且幽徑緣佳客掃道以布衣留細

雨評新卷名山憶舊遊悠然興未盡邴忍便回舟

小容齋集

養馬洲

譚襄敏公征閩寇歸里駐此

國朝

洪占銓

邑人

荒草亂空洲洲前水自流昔曾嘶戰馬今但牧耕牛虎

節邊防重麟臺將畧優來過芻秣地汗血想驂騑

送符耐農孝廉歸里需次學官

國朝

洪占銓

邑人

薰風吹急雨前路送征車萬里脫長劍十年歸故廬拂

塵妻子笑落月友朋疎覓得安心藥閒官一籠書

送鄒次賈歸臨川

宋

孫覲

不負丹鷄約來尋白馬盟龍鍾着帽進爵躍倒衣迎感

慨追平昔驚呼問死生殷勤一尊酒聞健且同傾

徒步輕千里重臨賁一邱留歡不暖席索立忽扁舟惜

別猶班草傳聲可置郵躊躇白首獨上仲宣樓

杜子野先生書院

國朝李信

先賢讀書處遺跡動人思
名豈門生著身於野處宜白
雲猶不散流水日長漸薄暮
冥鴻影遙天風自吹

石碧

國朝黃孝升布衣

摩訶闢靈境神工結撰奇
橫梁妨健翮嵌竇滌晴曦
馬祖傳心日牛師悟牧時
安禪曾設座舊構此留遺

捲雪樓歌

宜川十景之一

國朝

陳開潤

燕風吹不斷橋下水潺潺
黃葉一肩重白鷗三面閒
響傳疎柳岸人語夕陽灣
回首蒼松嶺孤雲自往還

貫虹漁唱

國朝吳祖馨

鼓棹來何處青山綠水旁
得魚聊唱和無笛自宮商
秋柳官橋冷春帘酒市香
日斜風定後兒女話漁莊

梅峰積雪

國朝吳祖馨

不分香與白梅雪總精神
姑射山中品羅浮夢裏身
樹搖珠錯落屏列玉嶙峋
骨格清如許扶筇欲訪春

鳳岡書院望軍峰

國朝吳祖唐

遠岫當窓列羣山獨有宗
四圍青嶂擁半嶺白雲封
倚劍看尖影棲真想秘蹤
高秋新霽後天外一奇峰

館中見百花塔

國朝 吳祖睿

好山都入徑高塔又當門
苔色層層染花陰處處繁
圓明臨水淨突兀倚雲尊
梵偈諸天香遙聞宿鳥喧

遊義泉寺

國朝 鄒廷樞

古刹空山裏行行一徑陰
入門流水靜倚樹白雲深
鳥噪蒼筤竹僧彈綠綺琴
欲乘無上諦竟日坐禪林

斧泉夜月

國朝 鄧來岐

巷曲人家少宵深尙未眠
中天懸明月古井照清泉
紅透茶爐火青浮竹徑煙
果誰尋玉斧夢裡問神仙

送宜黃宰任滿赴調

宋 韓駒

故老凋零盡君猶識了翁
深知名節似不但里闔同
了翁同縣自言慕其為人
政府方交辟高賢豈久容
他年汝溪上伴

我釣秋風 陵陽詩鈔

望鳳皇山

國朝 黃秩忱

城北一峰立盤盤石磴通
嘗攜謝公屐直叩堯王宮
竹戶天邊關蓬池眼裏空
小園凝望處鐘磬度微風

送宜黃丞周表卿

宋韓駒

往時束帶侍明光曾看揮毫對御床只道驂驪已騰踏
不知雕鶚尙摧藏官居四合峰巒綠驛路千林橘柚黃
莫戀鄉關留不去漢廷今重甲科郎

韓子蒼紹興初寄居臨川周表卿時為宜黃丞歲滿
作此詩送之後改峰巒綠為峰巒兩橘柚黃為橘柚
霜改第七句為莫為艱難歸故里益見其工末句甲
科郎本孔融汝穎優劣論

見能改齋漫錄

題縣簿清心亭

宋鄒極邑人

君向池邊展舊亭坐臨止水覺心清暑風茵苔塵難染
霜月蒼筤節更明對酒獨醒公外况隔牆人語靜中聲
誰憐老鳳堪棲棘夢斷韶音奏九成

遊曹山

宋 鄒 極 邑人

一到重來二紀餘身閱方悟昔迷途龍迴澗合木長澗
聖隱巖空峰轉孤自放山林隨處適相逢雲水有心無
野僧見我猶生敬我卽休官祇舊儒

赤松寺書事

鄒 極

宅畔池臺景自幽御風更作赤松遊嵐光穠麗經梅雨
天氣淒清正麥秋插稻農夫晨赤脚纜絲蠶婦晝蓬頭
閉身免赴公家急飽食無心爲汝謀

題擬虹橋

宋 黃 希 邑人

父老橋邊問我公笑談能辦濟川功天光分碧一千頃
晴影飛虹二百弓好與諸公來賞月曾知此地亦垂虹
乘風似有驚人語壓倒滄浪亭上翁

石砬

宋 黃 希

誰賦阿房不霽虹謾誇複道峭凌空那知海石驅來處
都在巖花晏坐中鯨背遠衝千嶂雨鼇頭高占一天風

漫郎更有中興頌倩把蒼崖子細確

寶積寺

宋劉 邑人

寶積重來異昔年修廊干步闢山邊南分靈派渠行玉
北敞高臺花雨天日照青林猶帶潤雲收翠崦尙藏烟
龐眉老子升猊坐不惜家風示衆賢

黃山寺

宋艾 申

谿盤九曲路潛通谿爾中藏獨銳峰皎皎月輪闕世界
亭亭栢樹舊禪宗風生萬壑聞城虎水落三潭想臥龍
淨掃山房隨意宿一燈明滅數聲鐘

鳳凰山

明張 墳 册江人

負郭山高落鳳凰主人林館自池塘交多詞客新詩滿
住近田家社酒香隱几碧梧鳴夜雨帶經黃犢下斜陽
覽輝霄漢他年事肯爲行歌嘆楚狂

遊曹坊洞石

明劉 彬 邑人

綠樹和雲靜小軒道人無事枕琴眠謾看桃李間開謝
不問桑田幾變遷丹鼎曉寒留宿火玉龍崖斷送飛泉
我來踏破蒼苔色恍惚仙遊到洞天

送道人涂志靖由都門南歸

明朱彥昌

羽衣來自五雲端勅賜黃麻墨未乾梅福南昌成吏隱
葛洪勾漏本仙官一聲白鶴橫秋老三尺青蛇出袖寒
歸到鳳山春滿屋絳桃花發繞江干

鳳凰山

明黎弁臨川人

江郭高擎一柱斜緣空石磴襯雲霞岩前宿草留香麝
洞口春禽嚙落花野老或諳仙客路山童時入市人家
凭欄一覽空浮世底用銀河八月槎

河東渡

明涂幾邑人

鳳山山前春草昏鳳山石下水流渾青天波浪雷霆鬪
積雨巖崖虎豹蹲戰卒有時高閼閱腐儒無力正乾坤
一家兩地干戈隔嘆息飄零親弟昆涂子類藁

南源寺

明范季隨

懶逐兒曹載酒行竭來蕭寺作清明江湖萬里此身健
風雨一春今日晴露地野花雙戲蝶並湖煙樹獨啼鶯
挂冠神武何時見只合深藏諱姓名

卓望山

明黃元邑人

萬仞奇峯逼斗牛何年仙跡寄浮邱金銀樓閣天中起
龍虎丹光夜半浮覽勝不須登華泰尋真卽此是瀛洲

兜高一顧羣山小唯見蒼旻在上頭

鳳凰山

明譚綸邑人

尋春此日愜豪遊緩步登高絕嶺頭山自北來蟠萬疊
水從東滙曲雙流清風繞座飄衣冷好景當懷一覽收
寄語花神休睡去野人踪跡尙能留

同馮邑令舜臣遊洞石

明邱兆麟臨川人

莫嗔峭壁判西東一竅其間有路通入去身如離世外
窺來天乃在山中興狂酒政無賓主景幻行蹤有異同
從比莫教猿鶴怨桃花流水已春風

單峰

明黎近

孤峰傑出萬山巔絕壁飛瀧若倒懸雷撼九關聲徹地
雲擎一柱勢參天朝逢朱雀翔空際夜見金烏浴海邊
欲挹浮邱問玉郭世間誰是鐵神仙

石砬

明黎近

華蓋東偏水一灣石梁橫架兩崖間莓苔積雨應難步
蘿薜懸雲僅可攀精衛有心填碧海巨靈無力擘青山
桃花浪急春風暖知是龍門第幾關

簾泉山

明歐陽聰

雲霧萬仞氣橫秋道宇中開帷石頭草色青蔥迷翡翠
泉聲彷彿走蛟虬談經似欲吞雲霧整幘猶防碍斗牛
不必跨鸞瓊島去優游此地亦浮邱

大司空朱公大司馬譚公同過龍華寺二首

明 注道昆

曳履平明下紫宸侯門落日占朱輪夜占北斗臨雙樹
路入西方絕四隣佛地翫依居士業人天同現宰官身
由來白社須公等不厭清齋共許詢

精廬負郭液池通瀾道紆車長者同人望於今歸二老
官曹自昔並三公上方鳴磬經聲裡歸路篝燈樹影中
屈指高譚難再得明朝端笏掖門東

太函集

軍峰

明 余嘉謀 邑人

萬疊嶙峋鳥道盤爐烟轟影護宮壇晴飛薄霧還疑雨
醉挾重裘尙怯寒鼓吹乍收天籟發輪蹄不到洞岩寬
瑤臺月色中秋夜笑對蓬壺咫尺看

捲雪橋

明 鄧象賢 邑人

捲雪亭開四望通曹黃爭派判西東非因暴漲穿渠決
那得清流抱郭同灘湧怒濤橫陌路梁成不日賴神功

宜黃縣志
最宜風月邀朋好嘯倚虹霓興莫窮

夏日同許伯隆鄒逸少黃子和遊義泉寺二首

明曾鳴謙 邑人

一派靈峰不可名遠天澹漠野煙生林泉風靜初無響
鐘磬雲歸忽有聲倚杖老禪同石語尋幽谿叟獨山行
僧房遙對松間水透得清光照眼明
門外松濤隱碧流竹間涼氣入庭幽客思臥月移禪榻
僧欲裁雲補衲頭靜後風聲時拂樹坐來山色半歸樓
閒情久擬栖泉石何日煙霞隨鹿遊

晚同諸君觴石砦下

曾鳴謙

石壁橫空一罅開坐邀峰翠落霞杯斷崖斜日留青靄
古樹涼陰老碧苔風帶鐘聲穿洞去雲隨人影度巖來
元猿白鶴情牽引疑是桃源不忍回

遊石砦

明黃鶴 邑人

巉巖古壁聳千重壁壁藤蘿綠蔭封烟密難遮穿澗水
風吹不斷入雲鐘青山隔洞雙排障落日歸巖半挂松
醉劇尙餘清事在曉霞光裏品諸峰

香林寺羅漢松云是唐以前物

國朝

鄧官賢

宜責舉志
數圍枯朽類汗尊百竅相勾直到根
睹葉始知生意在
摩膚祇覺委形存
菩提樹老千年種
造化機留一綫魂
欲訪山僧惟叩此
聲聲魚子在禪門

同運兒遊尙與庵

國朝 鄧官賢

乳鵲慈鴉噪未休
萬峰深處恣行遊
關心身事難爲樂
躡履禪林聊遣愁
烟暗晴巖常似雨
步經衰草獨傷秋
老僧松下如相待
導我前行指石頭

夏日偕友遊松竹庵

國朝 黃道生 臨川

岸幘尋涼偶入林
松山竹徑鎖雲深
蟬迎落照喧紅樹
鳥送殘歌下綠陰
遊客自高蓮社興
住僧誰悟法華心
坐看月上諸天靜
風度荷香悄欲吟

送宜黃令仲生姪之任便省太翁分司海陵

國朝 李來泰 臨川

寒郊煙景動高旌
司隸威儀出

帝京

由司城遷

摩轡自攜姑射雪
稱觴還倚廣陵筵
雲開荷

玉迎鳧影花滿曹
溪聽鳳聲見說江
頭親戰壘盡看買

犢事春耕

蓮龕集

解新淦廣文任歸里

國朝 吳璩 邑人

皋比坐擁久勾留此日投閒且暫休豈謂昏庸難稱職
恐為委曲或承羞歸裝幸有書千卷行色空餘月滿舟
握別人隨詩棹遠暮雲橫鎖夢中秋
花開五美色盈枝把袂何堪話別離千古斯文儒者擔
滿囊宦况冷官詩歸帆邈邈辭金水祖餞殷殷晉玉卮
羨殺季鷹今引退尊鱸熟處正秋期

荆國讀書堂

國朝 張應台 邑人

抱膝空山志竟成虛堂猶想讀書聲先機豈合蘇明允
護法長憐呂惠卿身後黨碑緣相國當時新義重先生
蒼苔蝕盡巖邊字望古徒深感慨情

石砦次韻

國朝 黃錫禕 邑人

禪祖遺弓不復彎猶留弓影護禪關冰當白日寒成骨
雪擁元冬瘦作顏僧侶慣看雲鎖洞遊人時遇鹿穿山
何當一杖探奇去踏盡陰厓濕蘚斑

軍峰春望

國朝 余蘭滋 邑人

兵戈歲久鐵銷殘躡屐猶登漢將壇鶴去丹臺雲護壑
山有浮烟開碧落客凭欄天圍近郡千家小翠合遙山
邱仙壇 二月寒藉草已窮千里目何須更上一層看
香曉遺草

登龍鬚山

國朝 黃振鏞 邑人

獨峙危巒會百靈 秋風殿角響泠泠 霞蒸落日千山赤

峽擁晴雲一帶青 極目江天浮瀕洞 側身鸞鶴度空冥

仙壇瑤草憑誰識

相傳山有瑞草 服之可以延年

杖策丹邱欲再經

乾隆甲午客宜黃 菡萏禪林與主人 余誠齋甚契

作此奉贈

國朝 羅有高 瑞金人

我逃於釋子為儒體貌充盈戰勝腴 觀化已醒蕉鹿夢

執身常若樞株拘高標古格空雲水 懶逐時賢判主奴

烏尾他年容造訪不妨僧服話黃虞

卓望山

國朝 黃蘭茂 邑人

峰嶺盤迴上碧霄 平沙遠岸落春潮 林間日暖嵐猶重

山半人來路尚遙 蒼綠掩扉僧夢冷 草青入殿佛香飄

城中一望烟塵界 修竹涵風自寂寥

譚襄敏公墓

國朝 黃蘭茂 邑人

冒雨來尋司馬塋 丹崖翠壁路分明 卅年御將頻專闕

點將圖

十卷傳書半論兵

公有奏議十卷

養馬洲前春草長

在洲

待三

化龍池畔暮烟橫

公有寓館在鳳山下園池最勝 楹帖云樓鳳林中幾處笙簧吹

夜月化龍池畔許

多鱗甲待春雷 威愈勲業垂青史 附尾居然享盛名

硤石漫興和洪鑑亭韻

國朝吳照南城人

溝涂引水曲通溪
複巷重橋路屢迷
聚族而居皆對宇
及時得雨看扶犁
餞春酒熟還留客
雜興詩成不要題
料得無求奢願少
書生甘藶又甘藜

聽雨齋集

送黃定軒給假歸省

國朝洪占銓

秋風非是夢鱸魚
底事搖頭賦遂初
為奉輕軒懷騎省
不妨小病免相如
當年白雪曾傾國
此後青山好著書
我憶斑衣徒一哭
寒氊深悔別親間

送熊靜湖進士得南安學官出都 洪占銓

廿年前共上都門
此後盤桓又幾番
楊柳簫聲春入夢
江湖月色夜開尊
浮雲變幻不經意
舊雨別離空斷魂
君乞酒錢予索米
好憑詩句話寒溫

桃華山贈寂庵

竺一庵方外

萬壑千山繞戶前
孤峰卓出白雲邊
松篁密密翻空影
樓閣層層鎖淡烟
賴有老翁親闢土
從教衲子共安禪
山房五月涼如雪
相對龐翁一悄然

靈谷附錄

宋劉迂

去雲歸盡黛眉橫
點染溪頭六曲屏
春入翠微殘照紫

天舍空碧斷峰青城藏綠樹江明滅人沒蒼煙路渺冥
定有子真歸谷口移文不負北山靈

故侍御鄒公抱節亭

宋孫覲

一邱黃壤卧龍泉光氣輪困夜斗邊長史青氈無舊物
拾遺華屋有修椽鳳麟毛骨皆如此水石風流尙宛然
亭下不生閒草木籀龍無數欲參天

見鴻慶集

志新誦近詩次韻

宋孫覲

客舍秋風我欲愁世途如漆莽悠悠半生小利營錐末
此日危炊上劍頭萬里歸鄉憐我老一廬小隱待君謀

惘然貌赤空相對扇面令人手不休

野鶴昂昂祇自竒水鳧泛泛強隨時禪乞我安心法
住世分君大藥資便欲乘槎從魯叟不須歌鳳嘆周衰
超然獨嘯千峰上一映清風萬竅吹

鷄鳴山寺題壁

明尹子和

卓爾高峰勢插天慈雲隱隱護金仙三春積翠凝遙岫
萬壑浮嵐盪曉川孤鷺影隨天際杳衆星光擬鏡中懸
倚松盡日吟新句不識龍鱗幾幾年

避虎錫庵

國朝謝應熊

策杖排雲步欲顛小奚扶上翠微巔一溪橫界平沙岸
萬竹紛搖曲磴泉午唄停時禽自語暑風清處樹無烟
逢僧細證華嚴義不繫閒心已入禪

曹溪湖古

國朝 釋道昱

蒲室傳心溯碧流曹溪自古抱林邱閑情似水無羈滯
談興如鷗任去留洗耳高踪誰可繼濯纓幽意渺難求
已知一滴爲霖雨未到人間不肯休

遊曹山寺

國朝 鄧化邦

搯筇緩步到禪林老衲相從話古今前武猶傳鴻雪爪

先建侯公有詩贈

曹山觀心和尙

高懷如寄鶴雲心花明佛髻攢峰老

泉咽龍牙觸石深法席觀師猶未遠禪燈宗旨可能尋

法水山觀漲

國朝 張士珩

暑雨連朝萬壑雷波聲人語共喧喧遠村無岸炊烟盡
枯樹如萍逐浪來八九欲吞常目極三千可擊忽心開
祇愁棲畝餘糧少秋雁嗷嗷繞路隈

定軒門長同鑑亭同年新入詞垣喜而有贈

國朝 應 軒 邑人

曠曠曉日

鳳城東並詠霓裳樂事同金榜名先魁一郡鑑亭殿試名居省

首銀臺試復冠羣公定軒朝考第一淹留舊徑門常閉徒倚

蓬山路始通新著仙袍花似錦長安看徧馬頭紅

遠追子正舊詞華吾邑樂史字子正官翰林著書並藏秘閣又是神仙太史

家秘閣香畱惟一辨瓊林秀發忽雙花編摩

中禁搜殘蠹鈴索西清集早鴉老馬自慙先路導蓬萊

悵望隔烟霞

襄敏勳名一代高當年通籍亦戎曹朝駟羽騎開蛇陣

夜握兵符運虎韜南海至今傳奏議吾邑譚大司馬諡襄敏曾任兵曹長

於兵畧征倭寇有功有奏議行世西川依舊擁旌旄時川陝軍務未竣備員粉

署嗟何補景仰前賢首自搔

一門桃李綴新枝並是梁公手自移余與定軒鑑亭同出徐珊仲先生門

緩步我隨鴛鷺列聯翩君到鳳凰池風清槐省分曹地

影麗花塼入直時事業文章同記取莫將虛譽負

恩施

旌陽山

明 鄧璿 邑人

山人誤出山坎坳黃泥坂白首一瘦筇山花笑歸晚

軍峰山

明 羅汝芳

我愛軍峰勝下栖岩底雲五更山月曉禪磬隔林聞近溪

集

仙人石

明 揭重熙 臨川人

仙人何處去空有仙人跡時一聞笙簫元雲來絕壁

我身有仙骨微聞鎖珮搖試上升仙石仙人去未遙玉鶴

集

龍泉寺

明徐鑾邑人

一徑沒蒼苔雙屐滑細雨修竹春日閒風來自相語

玉井

國朝鄧官賢

玉井鑑寒空輝輝星與水深夜無汲人清光靜如此

謁九峰定公於江寺

鄧官賢

問法謝無有瞻峰指九層但言峰頂上內有箇閑僧

定興寺雜咏

國朝周禮邑人

獬豸峰

獬豸能觸邪秉正自物性妄緣一以空立地可證聖

洒盃泉

削壁湧懸泉縷縷挂木末坐看天竺僧風雷起盃盃

鐵崖

何年五丁鎚峻削如積鐵時聞獅王鳴一聲蒼崖裂

天然橋

匡廬三石梁千載無人度却笑秦始皇驅石凌烟霧

三昧泉

誰攜八德泉映此三昧水試酌寒風生煩襟頓如洗

羅漢栢

宜黃縣志
古柏有貞性凌冬葉不易如晤鷲嶺人苦行深鐵脊
集

洋湖霽照

國朝 歐陽師夔

乘舟泛夕涼寂伴漁翁釣斜日掛林巒猶向湖中照

崇仙觀

宋 吳 鎰

浮邱仙袂風中挹子晉鸞笙月下聞翠蓋霓裳君過我
尻輿神馬我從君

人生塵土不可耐天上高寒定自嘉但約麻姑擘麟脯
莫尋勾漏問丹砂

妙覺寺

二首 宋 孫 覲

葉裡紅稀不見花枝頭綠暗可藏鴉春歸古殿蒼苔滿
一點殘燈隱絳紗

老眼逢春病有花浪淋醉墨字如鴉懸知不是唐王播

宜黃縣志
慙媿高僧擁碧紗

一翁亭

宋張商英

昔隱白羊山水中未容林下有高風而今起佩諸侯印
方許宜黃是一翁

送梅山僧

二首。梅山寺即廣濟寺在崇賢鄉

宋韓駒

寺門岑寂知何許想對千巖萬壑開傳得梅山梅子熟
莫辭先折一枝來

近聞僧說宜黃寺一道松門夜不關投老有田三百把
亦隨君去住梅山

觀音寺

明劉應明 邑人

綠柳青蟬紫萑花空門寂寞鎖煙霞香溪清冷無人浴
鴻鴻雙雙印玉沙

鹿岡書院

杜子野別業

明黃濯纓 邑人

落日荒村處士莊至今井畔是方塘喬林幾許迎新主
還有遊人說鹿岡

小童山

明羅蛟 邑人

掃石相邀坐月明塵襟便覺幾分清自憐吹笛無知己
也弄梅花三兩聲

寶積寺

明 余日章

終日長吟傍古篁
閒心猶笑白雲忙
夙生有業愁難懺
頂禮香臺火宅涼

遊新庵

國朝 鄧官賢

山上有山山不窮
一山還抱數山重
聞鐘只道山門近
尙隔前山三五峰

登杜嵐寺藏經閣

國朝 鄧官賢

當年阿難見聞多
真是持柯去伐柯
識得此中無一卷
不妨萬卷手中過

西華山 二首

國朝 鄧官賢

迴眺平林未有村
山多野少晝黃昏
老僧一箇供香火
不到遊人不啟門

寺向虎狼棲處尋
石崖隱隱洞沉沉
兩株松檜一茅屋
萬壑猿聲暮雪深

彌陀石

國朝 鄧官賢

彌陀數字勒蒼崖
半是銀鈎半蘚苔
幾度行人回首望
舌端誰箇不如來

雨中遣疾口號呈燕及仲章

國朝 傅占衡

畫雨臺中夜雨歸雨中心事夢中非蒲團曲几辭公等
除着維摩看翠微

中華山

國朝 歐陽斗照 邑人

長空白日澹清秋萬壑烟消見水流行到洞門風似箭
一聲鐘鼓拜浮邱

桃洞舒霞 十景之一

國朝 黃士光 邑人

雲影天光透戶斜人間此地卽仙家請看洞口春如錦
可是桃花可是霞

杜子野先生書院

國朝 羅維垣

老屋曾棲真處士瓣香空托扃門生
麟豐相業多些許議猶幸無人識姓名

過普靜寺訪息庵上人二首

國朝 謝應熊

踏雲穿莽叩禪關煩惱懣教清話刪
三笑橋頭烟徑遠一聲野鶴度空山

十年猶是始交吾贏得風塵兩髮枯
檢點琴書公案了共君長住碧峰孤

宜川雜咏一百首 選十首

國朝 謝階樹

城中高嶺與雲齊城外平蕪泛水低
司馬頭陀精相宅

河東原不及河西縣塲舊在河東有司馬頭陀者謂河東不如河西遂改建焉

錦屏風障綠絲縈花柳年年細織成一到洞門都入眼

今朝真在鏡中行洞石在北城外二里許

賭墅楸枰石未移回龍洞口聞難窺不知幾度樵柯爛

却費仙人兩局棋事詳古蹟志

近市何曾染俗塵鶯飛艸長惜餘春城南尚有桃源洞

當日提刑要避秦

櫻春樂事少年多隊隊兒卽踏臂歌忙殺樓頭聞秀女

月懸菱鏡畫雙蛾

子野才堪介甫師鹿岡書院鹿岡陞荒涼四代拏雲館

不見東方像贊碑

熟名第一譚司馬此日惟傳養馬洲奏疏一編遺澤在

年年杜宇哭松楸

曾山傳得洞山衣要識千絲共一機貝葉香留荷玉觀

善男今日尙皈依

千潭印月月輪明月自當空水自清更就夾山求轉語

月輪非向月輪生

緝芋難成夏布衫絲絲抽出賽春蠶可憐同巷相從日

宜黃縣志
辛苦盤來兩竹籃

妙覺寺二首

宋孫觀

老厭風波惡安閒且樂禪
開簾延白月倚杖立蒼烟
鳥散人聲裡鐘殘客夢邊
小蒲風葉偃薄樅露華鮮
句好吟髭斷權餘落照偏
人生但如此何處不翛然
古寺秋崖上清風半掩關
晚花明艷艷曉溜落潺潺
松筍穿堦瘦苔窠蔽石斑
翹沙憐鷺靜抱蕊看蜂還
心以空無累身從病得閒
儀曹獨何事終日賦西山

石碧潺湲亭

宋鄒極
邑人

危亭跨幽澗澗水日潺湲
響與鐘鼓應靜無車馬喧
布

金因利物激玉自澄源練引千尋遠珠傾萬斛繁倚空
橫石壁夾岍帶山樊漲駭天河決滯流地軸翻僧棲真
夢覺客至滌塵煩不盡登臨興忘言愧有言

過小童山懷羅蛟

明黃濯纓 邑人

駿委千金骨彫垂九萬名可能通冀北未及到南溟文
采三都重生涯一介輕清狂唐賀監放逸晉劉伶酒翰
飛蟾閣焚香貝葉經有僧來問偽無事即吹笙著屐沙
鷗狎吟詩山鬼聽分曹寧北極隻履竟西行一覺羅浮
夢千年箕尾星家音期白鶴弔客僅青蠅鷺鷥深慚我
蛇蟬却羨卿但疑開混沌容或失襄城采石墳安在山
陽賦不成淒涼讀書處愴惻古人情

石碧

國朝程九區 邑人

峭壁千尋起重巖一線開高圓摩日月瀆洞走風雷境
絕憑飛錫緣空看渡栢禪關通秘鑰覺路繞香臺說法
頭應點棲真跡未灰留題有生佛千仞白雲隈

崖上有郡守張

公伯琮大書
石碧二字

羣賢著述目錄附

宋

金明池賦 廣孝傳五十卷 唐孝弟錄十五卷 孝

弟錄二十卷 鄭氏通志畧云起唐及五代 廣孝新

書五十卷 宋史志有廣孝梯書五十卷注云梯 總

仙記一百四十一卷 諸仙傳二十五卷 總仙秘

錄一百三十卷 總記傳一百三十卷 登科記三

十卷 馬氏通考云記進士及諸科登名者起武德訖

天祐末鄭氏通志畧作起唐訖五代○宋史志

又有登科記一卷登科記二卷注云起建隆至宣和

景祐宋朝登科記三卷
登科記解題二十卷 宋史樂

卷江南登科記一卷 黃目傳
作題解 唐登科文選五十卷 重定科第錄十卷

貢舉故事二十卷 目錄一卷 太平寰宇記二百

卷 今缺七卷採入 坐知天下記四十卷 掌上華

夷圖一卷 神仙宮殿寤宅記十卷 廣卓異記二

十卷 附存 四庫書中 續唐卓異記三卷 上清文苑四十

卷 通志藝文畧目錄類文章 杏園集十卷 小名

錄三卷 李白別集十卷 李白外傳一卷 唐滕

王外傳一卷 許邁傳一卷 宋齊邱文傳十三卷

楊貴妃外傳二卷 今說部書中有太真外傳俱題云

朝樂史茲 綠珠傳一卷 宋史藝文志有曾致堯綠

商顏雜錄二十卷 仙洞集一百卷 宋史樂黃目

已所著為仙洞集百卷而藝文志傳記內有 已上

史洞仙集一卷 或別是一書抑文有互誤歟

並樂史著 子正著述極富舊志殊有漏畧今悉依宋

略著錄○王志云咸平五年詔 挂冠集 殿中丞李楊孫著

宜川集三十卷 度支員外郎鄒極著

洛誦堂文集 緯文瑣語 北事罪言 並布衣李鄒

卷三十一之六 藝文 著述 二

著

黃氏補註杜詩三十六卷採入四庫書中 永新令黃希原

本子鶴續注

北窓寓言集 黃鶴著

巢松文集 進士劉迂著

皇覽總論十卷 聖朝郡國志二十卷 學海搜奇錄

六十卷 樂太傅文集五十卷 並樂黃目撰

天象義府九卷

馬氏通考引陳氏云其書考究精詳論議新奇

渾天

左右全體星圖 並布衣應屋著

續傳燈錄 陳遷著

帶川集二十卷 晁百談著

靜逸先生文集 戴琳著

遺安集十八卷 史鈔十卷 書義斷法六卷 並進

士鄒次陳著

元

四書疑義 子史類編 並沙縣學博涂允仁著

二程遺書 譚善心編

譚晉明詩集 譚德生著

四書斷疑 易義矜式 並濂溪山長涂潛生著

明

涂子類稿十卷 附存 四庫書中 東遊集 並布衣涂幾著

鄒元方文集 王志云版 在南城 訓導鄒矩著

樂先生文集 四川茶鹽運判樂夔著

玉溪文集 給事呂文質著

斯白文集 流芳集 並右通政吳餘慶著

譚襄敏奏議十卷 分閩稿蜀稿薊遼稿三集多公 論兵所作採入 四庫書中 軍

政條例類考七卷 見明史藝文 志職官類 襄敏遺集三卷 附

卷一 並兵部尙書譚綸著

素履遺稿 提舉廖鐸著

應山集 法律管見 元風問難 並黃鉦著

春秋實錄十二卷 附存 四庫書中 鄧來鸞著

麗句集六卷 皆採拾古人四六中精語 分類編纂凡三十八門 許之吉著

蓬累行稿 黃敬銘著

蟬鳴草一卷 提扶館集一卷 祇園集一卷 閒澹

堂詩草七卷 並曾鳴謙著

右羣賢著述目錄王尤二志俱載之學校中於例似

有未安今附列藝文之末自宋訖明亡逸過半耳目所及略有增綴而於樂公所著攷證蓋詳審焉

國朝文治所敷遠軼前古鄉先生不朽大業嗣響昔賢蒸蒸日上如讀易齋及書龍書堂詩應氏一家之著作藍周師友之淵源靜餘之策章水之攷久已傳播藝林然往往有名山之藏尙未編校成集垂諸版本者若率爾紀載恐滋挂漏姑缺之以俟後人採補庶臻美備之觀至其譔述名目則選舉人物二志皆得瀏覽其概云

宜黃縣志卷三十一

雜記志上

條編成冊 尤志

順治十八年合邑里約黃肅宗潘士茂周宗黃敬宗黃文光雷昌華劉有恩吳萬年邱慶祥吳侍張瑩週徐甫貫等爲權蠹逆

旨變制蝕國殃民哭頒憲禁亟拯水火事詞告歷年經承鄒勛李坤李顯張燦黃元等蒙撫部院張批仰府刑官卽日親詣該縣示集里約逐一嚴查速報冊併發

察院傳批稔聞宜黃之官役猶鼠害民其官已伏冥
殛虎役仍然猖肆致茲被害嗚冤該道厲志肅清剔
蠹尤其亟務也宜加意訪拿使諸賸既去嘉禾自生湖
東一帶從此成熙攘世界矣 布政司批仰撫州府嚴
查仍先飭行該縣新署禁革繳時建昌府同知周諱從
謙署縣事本縣舉人歐陽孕熙歐陽斗炤鄒用陞歐陽
夢麟鄒閻胡上鄒兆軻貢士鄧官賢黃士光生員劉進
王天彩黃濬歐陽振生鄧逾熊奎周易黃豹胡永章鄉
里耆潘光甫黃宗堯邱天育劉伯光黃章贈吳一夔張
德祚雷大電等爲權蠹逆

旨變制科侵蝕國嚼民頌天捨詳各憲勅定條編以除
積害以甦重困事

朝廷大弊大害經承之科侵難清民間極苦極冤錢糧
之收解編累宜黃六百四十里遞年以六十四里值現
年均派編班答應收解無異自順治十三年以來官權
下移蠹操民命顛翻前規堯甦肥己包募經催十餘戶
錢糧不收不解私與納兌者坐享安全未就堯募者拘
解不已苦樂既已不均弊竇豈一而足如錢糧折封當

官兌發銀匠銷成大錠交庫從來舊矣近因經承媚官每百除火耗外復扣短平六七兩銀匠付與現年兌明經承門子庫吏庫夫入圍攤分於小錠每銀百兩未會出門現年已賠銀填十五六金經承計圖補填當官又挾現年親立借批捏名補庫且經承創立折飯禮折班禮悉索之名不一起批禮銷批禮漁詐盈千名雖現年領批解則腹心馬快更索解禮多金坑累耽捱遲悞尤可駭者奉上催徵緊急暗粧現年解頭起批塞責致累受刑切先朝一屆大差每名止費十餘金卽今順治初年其費較昔兩倍及至於今一屆大差約費萬餘其利不歸

朝廷徒飽蠹歎宜黃旣無貨泉可通百姓更無點金之術正供尙且不遑科派何能堪命所以一經現年不獨家產蕩然身家性命隨之故怨祖宗不應以田累子孫更且有賣人而無買主有自焚其廬搗家棄業徙而之他者實爲積歎積蠹大差之所迫也至於歷年正供無欠流水徵冊證據崇鄉間有荒蕪不過十分之一無奈經承侵銷藉此捏造民欠舊奉上催節報銀兩聳官一

槩重徵嚴刑酷比勒追數千填侵不足科斂又生借現
年催徵之名創爲卯酉以清丈歸戶之米指作漏糧日
逐痛比民半斃命紳衿稍欲鳴公非誣以逋國卽架以
通逆動申各憲箝口蔽冤此誠千古未有之慘酷者也
今幸福星分照借寇殘疆

聖諭憲令官收官解各邑遵行惟宜藐抗昧懇垂憐儆
邑加澤予遺速賜申詳上憲勅定條編成規收解權歸
官府催比責諸現年經承侵沒包攬可杜現年科派可
免爲國利民萬代頂祝等情具冊列款到縣蒙署縣事

周據此具詳各憲內稱查看包攬折禮扣平補庫火耗
漏糧等弊盡行刊榜嚴禁外其餘利病理合逐款申詳
當奉 撫部院張批據詳宜邑之經承如鄒助李顯張
燦李坤黃元等侵沒包攬殊爲可恨該縣既有如此之
積蠹何以諉道府廳縣尙未查真贓款重大者揭報拿
究以爲地方除害耶仰巡東道將詳開各款逐款嚴查
確議勒定條編規制務使收解各害俱清仍嚴查從前
弄權衙蠹確開贓款限交到三日內揭報以憑究追除
害繳速速 布政司批條草夙弊肆款誠爲救時急着

本司久慨其中矣仰撫刑廳逐款釐剔力行厲禁務使
成效克臻以清錮習繳本府紀批據詳收解催徵夫轄
諸款實有裨於地方務須立見改觀庶不徒紙上空譚
也刑廳韋批據詳各款亟宜禁飭查此案久奉 院道
批廳拿究仰該縣仍將各蠹星速解審不得以空詳塞
責仍候院司道批行繳本年八月內府刑廳韋諱 茲佩
奉 院司批委親詣該縣示集里約等語九月內刑廳
按臨本縣集逼縣紳衿逐款條議隨具詳各憲詳稱卑
職遵奉憲批示集合縣舉人歐陽孕熙等逐款細查確
議明白除各蠹犯拏究另報外該本廳看得署縣申詳
及黃肅宗等之告權蠹逆

旨等事一案總緣已故劉令之縱蠹長姦所致也查該
縣當日錢糧雜款弊非一端本廳正在查訪揭報聞而
劉令已薨病故矣里排等恐後弊滋深成例難破故條
列各款請 憲嚴飭以除往日之積習以立將來之成
規也第查里排所呈二十三弊署縣所申止四弊耳緣
里排慝害而得其詳署縣聞害而得其畧除弊務盡卑
職故就其詳逐款條議爲我 憲臺陳之

一官徵官解之宜亟行也查里排冊開錢糧六款如編班收解也無名補庫也通融重解也暗裝解頭也妄拿解頭也勒索賠補也此六弊者皆緣官解之不行以致里民之重困查該縣錢糧每年分爲二十班編班收解壹班報完貳班隨收初尙可行遲之旣久經承包募者多不依班次任憑拘拿上櫃收解里民一行收解而官得以私除火耗勒補庫矣經承得以私行賄脫挾重解矣甚至立空批而虛裝解頭悞國課而妄拿解役兌發之時又復無端勒索任意花錯抵假抵換始而苦累里民者繼而坑陷銀匠矣今紳衿里排公議凡縣官徵收錢糧當令吏書二名站立櫃旁親手兌明里役納銀若干填給印票眼同包封納銀投櫃不得復派里排編班收銀等弊仍照樂安縣之例每納銀壹兩隨班扛解叁分以爲佐貳領批水脚之用在民原係樂輸在官亦非私派官解一行而六弊盡絕可行之於樂邑者自可行之於宜邑官役不得行其私而小民得以蒙其惠此誠永久可行之道也

一捏名卯酉之宜亟禁也據里排冊稱從來經催錢糧不能逐戶親催雇募催比亦勢所必然乃始則以爲茅鬼也而責其輸納多金繼則以爲卯酉也而申報抵補正款此陋規可抵正項之所由詳也茲當新令蒞任之始使因循往例民其堪命乎况又復添差押催仍滋需索今議得雇募代催原所不禁而添設押差亟宜禁革總期於錢糧全完而止有捏名卯酉陋規者許士民徑行呈告是私竇旣絕而正供無不足之理矣

一答應供給之宜亟禁也據里排冊稱迎接上司中伙公宴等類及考校供應等費俱派之坊里答應願以銀壹百兩交入縣庫奏爲公費免其支應查該縣僻處山隅上司過往歲不一見此皆官役借端科派卽學道考校自有公費銀兩豈得擅派里坊私行苛斂今議得凡遇有中伙公宴併考校供應等費俱令該縣自行給發戶禮二房照例備辦卽其情願輸納之銀亦係無名之徵不便允從倘有仍循前例派人里下者府廳據實呈報庶夙弊可除而新政一清矣

一印發限簿之宜亟行也據里排冊稱該縣徵收錢糧原以隅崇仙待四字編徵嗣後有抽換撥冊之弊遂致完欠不清弊端百出查徵收錢糧屢奉嚴行必由本府印發紅簿逐日登記何得私行改換今議得以康熙元年爲始該縣先於年前照隅崇仙待四字造冊四本逐戶照數編徵呈送本府請印仍具文呈報憲臺并司道府廳衙門本府卽行鈐發給縣新正開比直徵到底不許以私簿徵收庶遺漏侵漁之弊可查而功令亦不等弁髦矣

一濫發夫轎之宜亟禁也據里排冊稱夫轎一項如差舍之往來有派縣官之出入有派縣丞典史之跟隨有派戶糧禮兵等房私行撥票著落坊里供應及查節曠又索常規查該縣原非孔道從無勘合大牌卽有緊急差使與縣官出入而額設夫馬等銀貳百餘兩儘足供其答應何至擅派里坊濫撥夫轎私索常規今議得一應差使往來與縣官出入俱不許私撥夫轎其有差使違禁者許經承登記循環經承濫給者許里民確據實呈至清查節曠原係查在官之銀

何得反索民間常例又縣丞典史自有編載夫馬工食何得亦行濫撥所當一併嚴禁以甦民力者也

一借名苛派之宜亟禁也據里排冊稱如買馬也而擅派官價備什物也而取之坊里修城垣也而責之黨正凡此者皆苛派也今議得該縣夫馬一項原無多金自無發縣買馬之事但新官濫任與上司接臨應借什物俱著令工房照全書動支修理置辦什物家伙等銀二十六兩自行備辦或遇城垣傾圮許該縣將額載修城銀叁拾兩詳請動支以上三款俱不許苛派小民永當嚴禁者也

一徵比舊例之宜循也據里排冊稱往年追徵錢糧歲分十限月分三比照限遵完民無逋欠嗣後改爲五日一比未免催徵不足今議得錢糧完欠不在比限之煩而在完納之多相應仍照舊例十日一比永遠遵行民既寬一日應比之力自餘一日催徵之力亦少甦民累之道也

一私拿稅契之宜亟禁也據里排冊稱戶書鑽管稅契負票差拿私立小票詐作契尾苦累難堪查典買田

宅不行稅契事發自有應得之罪應追之贓何至差
票擅拿詐作契尾今議得以後稅契人戶止許於本
縣掛號該縣彙齊報明布政司填發契尾到縣納戶
方照契尾納銀不許以小票私收致滋乾沒之弊可
也

一兵馬豆穀之宜開銷也據里排冊稱連因出備米穀
黃豆未作正項開銷查兵馬往來口糧草料自應作
正項支銷豈容擅行私派今議得嗣後一應過往兵
馬里排出備豆穀應付事竣照單算入正項錢糧以
杜侵欺科派之弊可也

一重徵漏米之宜禁飭也據里排冊稱如一款之侵挪
無解立法重徵一款之侵沒正供捏作漏米此劉令
之厲政也但劉令旣已物故而新令自當改圖相應
請 憲禁飭以絕弊端可也

以上諸款或一款而自爲一事者固就原款以要於
無弊或數款而歸於一款者亦就本事而挈其綱領
要以剔弊釐姦爲宜黃慮至深且遠也伏乞 憲臺
先行批示勒石永爲遵守 撫部院張批據呈十四

款仰巡東道逐一嚴查確議刑廳章覆詳巡道覆看
得宜黃劉令之在任也屬政多端故紳衿里排等備
將各款具控 撫部院欲立地方之成規以杜將來
之蔓害 卑職 前奉 憲詣縣示集紳衿等逐一查訊
按款條陳已無剩議要皆俯從民便預絕弊端其署
縣事周同知所申四款即在里民告款之內原冊登
答明晰今蒙行查相應按原詳議款備造清冊呈覆
伏乞核確轉詳頒行勒石 布政司批該廳條畫周
詳與革至當但立法惟期經久仰即行縣勒石例禁

著為成例巡東道張 諱 永祺本年報陞河南道未經

覆詳十二月署巡東道耿 諱 介蒞任合邑舉人歐陽

孕熙等貢生羅仲歐陽懋卿鄒振旻生員王天彩劉

進黃濬歐陽米邱瑞麟許廷鸞歐陽振猷張繡黃泰

徵吳甲鄒文茲羅汝為吳國棟黃宏度許儒珍曾佐

時許汝聯歐陽相黃暹等為事關

國憲情屬民艱懇恩洞燭利弊嚴勒條編以甦積困

以定成規事宜黃僻處山陬疊遭兵寇蹂躪田地雖

有荒蕪錢糧不敢逋欠緣自順治十三年以來官邪

蠹亂朋姦肆虐每年正供錢糧徵比侵吞乾沒十年
輪值大差包攬科派橫歛數載沈冤民苦莫訴今夏
合邑里排奔控院司道府俱蒙嚴批訊究隨後署縣
周通詳各憲現奉嚴批在案至九月內刑廳章奉院
批諭親詣該縣示集里約逐款嚴訊到縣因條陳一
十四款已蒙藩司批允行縣勒石但奉院批巡東道
逐款嚴查確議速報是案至今未見發縣恭遇 大
宗師文經武緯秋肅春溫福星照臨東郡小民咸被
新恩元年開徵伊邇宜邑尤望更生倘條編未經署
道覆詳懇乞賜文轉詳請發飭縣施行俾大害除而
大利興夙弊革而成規定一時鼎立千載戴德當蒙
耿憲隨即登荅款冊覆詳各憲奉 都察院董批據
本道呈詳據撫刑廳詳條議宜黃縣鄉耆黃肅宗等
公呈款議由奉批據詳議款俱係釐姦剔弊國計民
生兩有攸賴廢弛之邑立即見整頓矣著令勒石永
遠遵行又奉 總督部院張批細閱登荅條議十四
款在前宜黃縣貪官蠹役橫徵苛派大爲民害今該
道廳逐款議禁釐姦剔弊甚有益於地方仰卽行令

著實舉行勒石嚴禁永不許擾害坊里人等如陽奉
陰逆日久禁弛諸弊復萌該道應不時密訪揭報以
憑拿究官役一併重治至已經拿獲各蠹行該廳嚴
審詳報繳

四隅均汰黨副錄

宜黃縣城內地方黃隅四劉東歐陽南許周張涂朱等
呈爲黨正之定例當遵黨副之近弊宜革懇飭示嚴禁
以永成憲以固城守事竊惟

朝廷嚴保甲之令郡邑有黨正之名爲役雖小攸關甚
大宜黃僻處山陬城中分列四隅據門戶以定保甲分
壕口以守城垣寓行伍於疆界之中卽兵卽民嫻步趨
於耳目之熟可變可常自宋明以迄於今未聞有私倡
異議變易舊章者也然戶口迭盛迭衰大地有循環之

宜黃縣志
候煙火之或隆或替滄桑有變遷之期如稱盛於昔者
勢或少替於近日卽偶替於今者理必遞繁於將來往
者太平無事各立黨正專任甚有餘閒邇來軍務頻仍
添設黨副分理反致推諉况多一人則多一人之浪費
若省一役則省一役之弊端甚且顛翻數百年之成規
請增請損奉行深爲不便更有創立一二人之私議改
保改甲紛更確有難循茲幸 部院大人保障西江股
肱上國雖彈丸之地亦屬

聖主之士卽偏方之籍仍關撫字之心懇於一城之內
並削黨副名目四隅之役均立黨正一人歷朝定制增
之無敢妄增萬年維憲損之無處可損嚴禁改保併甲
之弊黎庶安舊沿之疆界詰姦甚便重申連坐相睦之
條井里無私更之制度城守如常現修縣志祈飭敘刻
勒石通衢使民通知地方幸甚蒙 撫部院董批仰撫
州府查報 郡伯劉批黃隅四等呈是否從公起見汰
去黨副有無偏累仰該縣獨斷務服人心以垂久遠繳
邑侯尤看語 看得五隅例有黨正約束地方又設立
黨副以協佐之其來舊矣邇因西隅地方以該隅地里

官書縣志
爲狹且值兵燹之後議將本隅地方彙合一保編分十
甲遞年僉舉一人承充黨正答應各凡公務而東南北
及附東因而有並汰黨副之議而以黃隅四等具詞上
控合如議均汰黨副一役敘刻入志以順輿情若保甲
則仍舊貫仍公同議確以垂永久茲後不許紛更致滋
推卸以悞地方也

郡伯劉覆詳看語 看得宜黃五隅舊有黨正以應公
務而黨副之設果係蛇足且多一人卽多一番之擾今
黃隅四等具詞控 憲每隅議汰黨副一名在舊制旣
無所損而民害又可永息非奉 憲批無以示遵守而
垂久遠茲據該縣查議前來相應詳請批示勒諸貞珉
以安地方可也

巡撫部院董覆批黨副一役旣爲民害如詳汰革刊入
志書永爲遵守繳

學宮報功祠公產

學宮有歲修田檢蓋以時墜茨丹雘歷久如新合邑公
捐貲產凡縣府院試俱給卷貲鄉會試俱給貲斧例舉
歲科優等及新進童生輪替經理學中老宿督其事計

三年所入租息分別給送會試若干金鄉試若干金永久不廢京城會館有歲修產

鄉試餞舉日祭祀

帝君之費係生員吳震璐舉人應斯鳴出貲買店一所積三年貢錢供之

宜黃縣志卷三十二

雜記志下

宋孝建三年丙申四月塗黃嶺下民田得銅鐘七口各重七百斤內史傅徽以獻於朝

宋高祖紹興十三年庚辰多螟有大蛇見於丞治長三丈縱之十里外復至者數四

虞伯生先生在宜黃時嘗倚樓吟詩有五更鼓角吹殘雪之句忽隔溪一童子揖而言曰角可吹鼓不可吹亟招之已失所在蓋詩鬼也

寶積寺僧雅有棋癖一日有士人來與對局衣服辭貌都雅問其鄉貫則曰徽州紙商僧念鄉中素未見如此人心殊駭異他日俟其去跡之則見登山後小徑化爲黃龍從石孔中蜿蜒而入因名其地爲迴龍洞

鄒極未第時禱於后土祠忽夢神人呼曰天道本無成明從公下生溫黃前後竝黑暗裏頭行大十口止各哀號三兩聲兩個六十五祇此是前程其後皆驗初聯則解試天道無爲而物成賦公生明則禮闈題也次聯則諒闇榜名次在溫黃之間也三聯則持節本路丁艱也終聯則夫婦皆六十五歲而終也

邑河東有李姓者諱號望天初治圃爲業後充縣幹辦順治十八年九月廿一日奉縣符往鄉催徵糧稅暮歸值城門早閉語妻曰今日糧限失期明日必被笞掠痛飲三斗腹忽暴脹亟啓戶如廁妻曰村中虎多暮夜安敢啟戶望天曰何傷遂從側戶而出妻久不見還遽譟呼莫或應出戶索之惟勾屨一編杵一條在始慟哭謂爲虎噬比曉搜討莫得遺骸明年正月有稗販數人從城西南來望天肩兩豚雜其中識之者大駭詫爲鬼魂

爭擁至其家望天乃自陳狀謂某當夕如廁時星月滿
畦逐步變黑久之林中有光見一偉丈夫冠威金兜鍪
雙瞳如鏡某猝顧便錯愕踣地矣俄如雙車輪挾某腰
其去甚駛所過頃刻異狀少選至一闕門中立甲士判
官等籍問拘攝何人呼至階問百餘言只類夢中囈語
居無何聞鐘聲螭頭上突出一大殿有女侍百餘人傳
呼夫人出視事見一女郎曳步升座女侍次第拜謁獨
前點視老人抗禮長揖徐啟云拘到罪人皆應得陰譴
惟宜黃一人不在限夫人容霽執管向某一揮某身已
在洲上仆臥向來境界俱失詢之路人云虔州地方州
西有山曰萬靈岩因引領驚顧未見有屋宇惟險崖峻
嶺煙嵐開闔而已計去家之期已三閱月因備力佛寺
得錢一貫計路費稍可給亟趨歸遂截髮爲僧

軍峯山下晉時有女浣衣水次爲蛟引入石中雷擊石
破見蛟死及女人尸浮水上遂名破石

元末洪忠良性好善喜種芙蓉築館於宅前段心鑿大
池植花木外護以短垣一日遊池上見赤鯉躍出垣莫
知其向忽童子報曰公家生孫矣數年後鯉如前躍又

生一孫因名其段曰花園段池曰躍龍池

硤石洪衍母周氏患消渴遍禱莫效忽夢人謂曰汝母病非得欄井水不可吾爲分一勺可向屋左尋之次早掘地得古井取水飲母病卽痊遂名其井曰分欄鄉人病飲之多愈

慙孝子應姓逸其名生而瘖手足孿縮涕唾交於胸少孤無他知識惟知有母恒面壁作指畫狀戲之則啼笑並作乞於市與之錢米不甚歡與之煙草則躍而去蓋以其母喜吸煙草也母病輒仰天泣拜似欲以身代者母歿將葬躍入穴中衆強掖而免哭其母兩目血出血盡而死

清源師者西川灌口神也爲人美好以遊戲得道演古先神聖入能千唱之節初止爨弄參鶻後稍爲末泥三姑旦等雜劇傳奇此道有南北兩則崑山之次爲海鹽吳浙音也其體局靜好以拍爲之節江以西弋陽其節以鼓其調喧至嘉靖而弋陽之調絕變爲樂平爲徽青陽譚大司馬聞而惡之治兵於浙以浙人歸教鄉人子弟能爲海鹽聲後人立清源神祠以田賈二將軍配食

臨川湯若士爲之記

紹興辛亥冬撫州祥符觀松降甘露若飴有郎官徐其
姓者獻甘露松古詩於太守其詩畧曰仙臺之陽石壇
東下有亭亭太古松又曰至誠感格合天意露零青松
眞上瑞云云太守以爲祥因奏於朝坐言章罷郡先人
時謂予曰熙寧六年冬建昌軍距城五里甘露降於進
士徐上交別業之松上濃如厚酒其味香甜上交折獻
於太守張郎中子方子方率寮屬觀之欲以上聞路過
鴈鵬山下牧童見車馬皆叫呼曰此山松上亦多甘露
何獨彼耶各持松葉飴弄以示不誣時有野夫賣藥於
市者語人曰太守不察耳何者爲甘露露從天降必徧
於數畝豈止松乎吾嘗客華陰縣民亦有以甘露告縣
者令因出按之有道人笑焉令怒械繫之道人曰譬如
人身精液流通均布六七十年中若夫壽促必漏併於
未死之前此松始將槁耳官人若不信請寬我以俟明
春此松必不榮也令如其說至期果驗焉軍民得其說
因省景祐丙子城西天慶觀松昔嘗一枝有甘露因往
驗之昔時甘露所降之枝果已先朽張守因不復奏知

先人因言鄉里松有甘露亦甚多其實非也乃松液耳

撫州羅志

邑南明諸生歐陽振鷺字儼然與龍泉寺僧斗照談詩甚契一日僧笑謂儼然曰吾一緇流荷君厚義來生當爲君嗣書架上有研吾所寶愛坐化日君取鎮吾心來生必聰穎過人儼然亦笑諾之既而儼然婦李氏有姪將媿兒一足先下家人惶恐忽門外小沙彌來言斗照大師已圓寂一足垂床下衆不能舉儼然倉皇入寺捧足卽上取研鎮其心囑家僧經理喪事迨歸兒已生矣因名曰斗照順治甲午舉於鄉

南唐給事中喬彞知舉進士及第者五人卽邱旭樂史

王則程渥陳皋也皆舉數升降等甲無名子以爲喬之

榜類陳橘皮年高者居上

趙德麟侯鯖錄

鴈湖李璧云友人宜黃李郭嘗云介甫讀墨詩終篇皆

如散文但加押韻爾意以爲詩益散古無此體然如韓

公謝自然誰氏子詩已如此

李鴈湖注王荆公詩

胥仕隆禱佛開縣青詞云伏爲云云於是仕隆同衆就於顯陽古刹三寶聖前告許水陸無遮大佛事保佑具

詞面聖開縣乃於開寶元年四月二十三日同前進士
某等前去奏請果蒙佛天有感得面聖君就命左丞相
陳脫兒中書省差黃平章陳監省帶領仕隆等同鎮改
水東待一都平濶處為縣基地適有道人來言是山不
若水西胥氏祖山可為萬民樂地此處止有一佛地後
更有一仙地令將兩處水土稱之果仙鄉為重隨奏聖
君發監縣陳山童判簿廖伯貞到縣云云開寶二年三
月上七日建造圓成復請本官會集於顯陽寺圓明寶
殿酬答心因重修殿宇佛像宜黃縣監縣陳山童修捨

中佛三尊判簿廖伯貞修捨文殊普賢二尊胥仕隆修
捨羅漢十八尊門樓一所嚴公迪修捨護法金剛二尊
吳延光修捨押社王太尉一尊合邑人民修捨佛殿法
堂僧舍開寶三年四月浴佛日題

見王志胥仕隆傳

白土寺普惠慈應饒禪師相傳六祖慧能在韶州寶林
寺付衣鉢師與焉唐會昌時汰僧師已證果擇地挂單
有白土淨紅塵偈後來白土寺數日化為童子傭工寺
前婁遜家暑日耘田雲覆其上田分裏外塚故地名有
裏陰外陰嘗橫港積碎石填巨浸不損鄉人復苦水溢

師持驅牛小竹竿穿數孔卽驟滅欲再塞之滲漏如故
嗣後不盈不竭灌龍脊堰田二千餘畝一日跌化河岸
路人推入水臭不堪聞漁者戲曰汝能掩日光息臭氣
令我多得魚當神祀汝果多得魚天陰三日芳香四達
因泥其屍奉之隨示夢婁姓倡首建白土寺殿宇日期
皆師預定婁慮無大木夢師謂某月日時下流二里許
半陂潭有大木可取用殿成餘木一株大數圍臥沙水
中今猶時隱時現

樂安何太虛集有陳文秀妻賴氏行述云小嶺

又作嶺
徐嶺賴

氏在宋時世儒衣冠平可才可兄弟皆有聲場屋才可
未第卒平可登咸淳辛未進士尉宜黃而湖西羅氏文
獻外紀載賴少文詩下注云小嶺金坪人諱平可咸淳
辛未進士與羅開禮同榜永豐縣志又作羅東升豈平
可字少文別字東升歟其作尉年分不可知秩官志無
從位置附錄於此又宋慶元三年有迪功郎主簿陳宥
迪功郎縣尉趙經見白土寺普惠慈應大師勅書碑舊
志失載

尼涵光江西宜黃人姓鄒氏歸譚大司馬綸之孫其夫

惟魯不知書涵光棄去走京師上書請南遷不報會鼎
革遂爲尼每談故明門戶事源流甚晰居寶應朱秋厓

克生曾見之

王阮亭池北偶談。按涵光孝廉鄒啟元之女適潭河圖之子報國報國字益伯

當得蔭不受以縣試第一補諸生善屬文工書法其師歐陽奎刻華陽館草報國爲作序及傳家藏千字文刻版有文衡山筆致今尙存

謂惟魯不知書傳聞之誤也

曾楠崇七都人以拔貢赴選歷任幹城寧羌沔縣知縣
釐剔弊政忤大吏罷職夜夢城隍神召請設席命坐上
座并勘審各卷宗醒以夢告兄彬咸異之閱月卒死而
復甦曰上帝憐我爲官清正命爲沔神沔人塑像祀之
故沔有二城隍神閔洪位爲撰碑文

崇鄉水道自廖坊一源以下每值淫雨溪漲砂石壅塞
田畝不可數計皆由新豐市左右虫氓私開爐厰堆沙
淘鐵以致土崩崖破下流滯澁凡隨河居民無不受害
此弊端之亟宜禁者也

棠陰吳朝奉宋宣和時人家富巨萬六代笈單有道人
精堪輿求擇先人葬所道人曰汝欲富乎欲貴乎答曰
富不必求貴非敢望但得子孫繁衍吾願足矣乃爲定
葬竝許之曰四世必加千煙後果如其言明翰林學士

王公英棠陰八景詩序末云山川之秀華美於吳氏者
於此可徵殆不僅爲八景言之也

重修京都會館序

吾邑京都會館創始之日材美工良視他館爲勝歷今
八十餘年人猶羨之嘉慶六年大水左右廂隨墻傾而
上房中廳門屋皆如故邇因城鄉舊置修葺田租無復
寄錢入京不能及時掘草刮摩遂至積雪滲潤雀鼠穴
居篷席腐穿樑椽朽折街束小屋六齋盡倒塌若復因
循不亟改造後悔何及况十餘年來計借者衆館後空
場約可蓋屋七八間亦當預爲計也嚮例初入館及題
名團拜必肅祀神龕爰議特設各姓生座以昭誠恪每

主助錢三十千文并於報功祠設虛舉祭散胙會試之年館內舉祭祠內送胙不數月閒得錢若干酌付北上公車庀材鳩匠記簿結算適縣志局尚未收因附載焉吾邑離京四千里臘月登舟二月中旬始到過蘆溝橋入彰義門自西頭遞迤達東頭北行平樂園至關王廟前街有會館面東背西門簷豎黑油欄甫下車衙門役迎候左轉進磚門左右二廂杏花欲放上石階升中廳廳旁皆墻墻外各兩間由側階門出入進第三門望大槐樹合抱枝葉穠蔚左右四廂上房整列四長期中一小廳主位在焉燈火炯煌逡巡肅揖而退命僕人撲去衣帽塵攜被囊箱篋各就住房鋪設牀几房廳滿糊研光牋潔淨明亮讀書寫字一如齋室心旣安而祖靈復祐之將見雁塔聯名鸞坡接武庶足表揚盛德於無窮也已明歲工竣必更清釐舊置田租以爲修葺之費然後前人創始之功不墜而此舉亦可藉以長存也道光八年冬至前十日萊洲黃迪筠序

京都會館主錄

宋進士任蘇州府太守劉公

諱

魚

字子衡先生

宋薦舉吳公

諱

雄

飛先生

宋奉議大夫鄒公

諱

仁遠

字貢善

號六神先生

宋薦舉任連水令鄧公

諱

義山

先生

宋文林郎熊公

諱

祐吉

字永繼先生

宋贈殿中丞戴公

諱

丕

字熙績

號康哉先生

宋衢州通判陞粵東潮州刺史李公

諱

大郎

號鸞坡先生

元歲進士李公

諱

陞

字光裕

號天相先生

元儒士許公諱肇生字孟仁先生

元儒士歐陽公諱才字才立號嶽瑞先生

元邑庠生張公諱閻字受卿先生

明布衣黃公諱用治號佑同先生

明優舉大賓吳公諱為隆字秉德號盛齋先生

明冠帶大賓熊公諱以和號懿六先生

明處士敕贈尙義應公號子良先生

明處士黃公諱進號忠齋先生

明誥授中憲大夫通政使司右通政崇祀鄉賢吳公諱餘慶號斯白先生

明處士歐陽公諱省躬號雲山先生

皇清歲進士誥封絳州直隸州知州例封河南陳州府知府黃公諱益謙字恭士號牧堂先生

皇清誥贈武德將軍吳公諱應文字煥之號炯堂先生

皇清郡庠生誥封中憲大夫例晉通議大夫程公諱象春字宮占號梅谷先生

皇清太學生歐陽公諱可遠字克昇號慎齋先生

皇清附貢生考授州同余公諱國柄字宣衡號靜庵先生

皇清鄉進士授文林郎應公諱昇字上治號仙溪先生

皇清儒士席公諱洪猷字華遂號敏才先生

皇清附貢生例封文林郎吳公諱賚弼字予良號夢軒先生

皇清鄉進士截選知縣應公諱需字象騰號閒軒先生

皇清馳贈文林郎太學生黃公諱家棟字挺中號翼堂先生

皇清儒士程公諱紹節字軼青號茂竹先生

皇清例贈修職郎太學生黃公諱雲從字秀良號瑩堂先生

皇清處士例贈文林郎余公諱寅止字子安號誠齋先生

皇清敕封儒林郎例貢生歐陽公諱馨字梅白號薌山先生

皇清太學生敕封文林郎例晉儒林郎翰林院編修黃公諱捷岡號玉亭先生

皇清儒士例贈文林郎謝公諱時恒字化成號定圃先生

皇清誥封奉直大夫附貢生鄒公諱廷黻字玉堂號翼齋先生

皇清儒士李公諱尚潔字宏也號有道先生

皇清恩授登仕郎許公諱應賢字聖希號復齋先生

皇清敕授文林郎明通進士任臨江府教授黃公諱朝鼎字鼎儕號頤齋先生

皇清賜進士及第誥授朝議大夫翰林院侍講前講官侍讀學士謝公諱階樹字子玉號向亭先生

皇清例授儒林郎候選州同馳封奉政大夫程公諱卓棟字飛浦號誠齋先生

皇清太學生敕授修職郎候選府經歷例贈儒學訓導黃公諱錫祐字伯承號學喆先生

皇清太學生隨營六品頂戴程公諱卓柱字承宇號立齋先生

皇清太學生鄉飲介賓黃公諱錫鈔字德佐號鎮堂先生

皇清登仕郎鄒公諱萬邦字協和號睦堂先生

皇清太學生例贈修職郎歐陽公諱廷獻字玉白號崑圃先生

皇清教授修職郎福建建陽縣縣丞羅公諱躍衢字明川號雲街先生

皇清鄉賓例贈儒林郎王公諱長青字季茂號松筠先生

皇清太學生鄒公諱朝棟字國柱號卓亭先生

皇清登仕郎黃公諱金柳字協和號春園先生

皇清太學生歐陽公諱駿字良白號冀野先生

皇清郡庠生鄧公諱斯濡字蔚捷號濟庵先生

皇清鄉賓鄭公諱大彬字必先號均亭先生

皇清太學生鄉飲介賓李公諱延棟字佳木號柏園先生

皇清太學生例贈修職郎張公諱拜辰字拱樞號靜軒先生

皇清郡庠生例贈文林郎熊公諱捷元字盛傳號永和先生

皇清太學生鄒公諱謙字汝能號益堂先生

皇清太學生吳公諱理字文璧號質夫先生

皇清鄉進士應公諱麟字固呈號坦園先生

皇清太學生鄒公諱明志字介臣號匪石先生

皇清太學生許公諱文繡字九章號學軒先生

皇清太學生席公諱雯字煥章號澳齋先生

皇清儒士張公諱坤字乾匹先生

皇清教授修職郎湖北分縣鄒公諱朝佐字砥柱號輔亭先生

皇清邑庠生洪公諱夢麟字步顯號石崖先生

皇清儒士羅公諱秉瑜字焯玉號懿齋先生

皇清邑庠生例贈登仕郎周公諱名華字佩之號蘭谷先生

皇清附貢生鄒公諱麟字瑞文號魯村先生

皇清登仕郎吳公諱欽陞字連章號階圃先生

皇清太學生應公諱藻光字繪五號華堂先生

皇清太學生歐陽公諱曄字開泰號靜齋先生

皇清邑庠生歐陽公諱文衡字階蘭號升齋先生

皇清太學例贈修職郎鄒公諱襄道字象坤號允齋先生

皇清太學生程公諱槐字旃材號佑圃先生

皇清太學生徐公諱吉士字洪州號藹堂先生

皇清例貢生許公諱學孔字集成號泗齋先生

皇清敕贈登仕佐郎黃公諱貴審字漢萬先生

皇清儒士黃公諱顯輝字廷珍號裕軒先生

皇清敕授文林郎國子監學正鄉進士應公諱露字鶴聞號三峯先生

皇清太學生潘公名星煒字可南號拱堂先生

皇清太學生鄉飲介賓劉公名朋字壽三號如岡先生

皇清太學生鄉飲介賓鄧公名光國字玉輝號連城先生

皇清太學生李公諱如霞字綺南號彤齋先生

皇清郡增生歐陽公諱大年字季錫號雲齋先生

皇清太學生鄧公諱逢春字先登號首軒先生

皇清廩貢生救投修職郎分宜縣儒學訓導席公諱濬字永清號琴山先生

皇清鄉進士例授文林郎吳公諱環字西璧號仙石先生

皇清太學生黃公諱虛齋先生

皇清太學生江公諱上秀字步青先生

皇清賜進士出身河南孟津直隸隆平盧龍臨城平鄉知縣席公名元榜字志中號臣鵠先生

皇清例贈登仕郎黃公諱臣瑋字品如號仙谷先生

皇清例贈修職郎歐陽公諱元字友白號一軒先生

皇清例授儒林郎候選布政使理問王公名宣仁字用中號適堂先生

皇清賜進士出身誥授通議大夫恩賞花翎廣西按察使署布政使護理廣西學政程公諱卓樑字眉宇號任齋先生

明處士黃公諱相字良佐號華樓先生

皇清儒士梅公諱世播字笏客號盟齋先生

皇清太學生梅公諱仰洋字富川號東溪先生

皇清例授儒林郎熊公諱芹藻字宮茂號紫齋先生

皇清太學生梅公名嶺郁字佑植號培堂先生

皇清儒士黃公諱廷臻字濟人號達堂先生

皇清太學生鄧公名佩文字郁堂號闇齋先生

皇清附貢生翰林院待詔前刑部司獄鄒公名學洙字源文號清獻先生

皇清太學生吳公諱國樑字英士號健庵先生

皇清太學生黃公名曰襄字勸卿號賜堂先生

皇清修職郎陳公諱洪猷字秩文號經會先生



宜黃縣志後叙

邑乘之未修也百五十餘年後者

洪公介亭與詢向亭學士同官編

脩欲仿魏和公先賢傳綜輯見聞

自成一書嘉慶戊辰迪筠代攜尤

志坊上舟中繙閱見列傳已有批


割霞及壬申洪公弼向亭志暇卒
業道光二年毓中丞議修江西通
志刊發三十二式令府縣預脩以
資採取吾邑紳耆皆慨然於前
志之疎略不全雜亂無序傳訛而
失真省費而過陋思有以釐其舊
而更增其新且百餘年來人文彬蔚
遠軼宋明而縣志以此及今不修則後
之人愈無由措力矣是冬迪筠兄弟
同赴京明年癸未仲夏三軒提南宮
以縣令分爰湖北十月始歸詢及志
事則宗考定軒先生與歐陽澈六

吳藕汀詒公批纂十餘門類迪筠養
疴仙巷塾中藉逋文債甲申三月
先生嚴促入局所纂多類已付開雕
城鄉底冊糜至向亭亦累寄鈔本
先生晨入晚歸鬚髮皓白目光如
星手執、動搖倩人拗管坐久則

倚榻少憇有一事之疑一字之未
妥參核古訓斟酌在心務求愜當
迪筠與張靜庵吳藕汀詒君子博綜
互證反漢遺難炎日當空汗流襟
袂酒闌茶罷間以談嘲先生徯之自
謂樂而忘疲也長至後門類粗就割

劇過半先生既老病相尋迄今年
二月遂不慈於暑各以事牽無由
合并迪筠搜經山齋從從善儂獨
時之自藕汀入局察勘補苴繼光生
之意藏完巨帙以遺後人後人多才
其以較前志為何如惜乎介亭先
生不及見此而同定其公論於千
秋也

道光五年冬五前一日鄉進士
揀選知縣教諭銜管奉新縣
訓導事邑人黃迪筠謹叙



跋

縣溯權與而後再建以迄今志
考首基以來四修而及此今
國家九服承流八埏飲化凡在
郵駟所達掌備職方况繫斗
牛之區古稱侯國乃者瞻瘡阜

之九疊真面重開總章貢之雙
流清波可續當多魚勉諸公忤
躍爰以通志之徵先定是乘之
采歲甲申宜黃志甫成爵滌
自京師假旋讀而稱曰美哉
斯志於邑有光觀一千六百
載之規瞭如示掌增一百五十
年之事朗若列眉上可以貢
之

天府典榮攸備下可以布之
閭巷文獻足徵則夫陟崇阜
而學榘楠之植臨深淵而

懷珠玉之孕扶持靈淑蘊釀
菁華俾樂氏之文章一再世
司馬之佛烈復生臣居廉
讓之間人問山川之羨後呂
作者由此其選若夫稽井
竿之盈虛察閭閻之肥瘠宣
究風俗使去澆而還淳懲飭
紀綱令勸善而懲惡固黃德
之有賴實論蒙之是需竊願
巴東之柏種自萊公襄城之
桑植諸范宰則翔覽德輝
豈惟漢漢之相涵泳化澤

不獨迴瀾之鱗云耳

道光甲申冬十二月

賜進士出身翰林院庶吉

士前以教諭管瀘溪縣訓

導事邑人黃爵滋撰

